

**SEVENTH LEGISLATIVE ASSEMBLY OF MIZORAM
(SIXTEENTH SESSION)**

LIST OF BUSINESS

FOR FIRST SITTING ON WEDNESDAY, THE 27th JUNE, 2018
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu LAL THANHAWLA**, Hon'ble Chief Minister to make obituary reference on the demise of Pu P.B. Nikhuma, Former Member of Mizoram Legislative Assembly.

PRESENTATION OF REPORT

2. **THE SPEAKER**, to present to the House the Seventeenth Report of the Business Advisory Committee.

LAYING OF PAPER

3. **Pu LALSAWTA**, Minister to lay on the Table of the House a copy of the Mizoram Lotteries (Regulation) Amendment Rules, 2016.

LEGISLATIVE BUSINESS

Bill for introduction, consideration and passing

4. **Pu R. LALZIRLIANA**, Minister to beg leave of the House to introduce "The Sinlung Hills Council Bill, 2018".

ALSO

to introduce the Bill

to move that the Bill be taken into consideration

AND

to move that the Bill be passed.

S.R. ZOKHUMA
Commissioner & Secretary

....

S P E A K E R : Thu ang ule. Mi tha chuan a ro bawm tha ata thil thate a theh chhuak thin a, mi sual chuan a ro bawm chhia ata thil chhiate a theh chhuak thin.

Matthaia 12:35

Vawiin hian sun tur kan nei leh ta mai a. April ni 11 kumina boral ta Pu P.B.Nikhuma, he House member zahawm tak lo ni tawh thin Deputy Minister te pawh lo ni thin tawh sunna hun kan hman a ngai leh ta reng mai a. Tunah hian kan House Leader zahawm tak Chief Minister ni bawk Pu Lal Thanhawla a sunna hun hmang turin i sawm ang.

Pu LAL THANHAWLA, CHIEF MINISTER : Pu Speaker, vawiinah kan House zahawm taka member lo ni reng tawh, Minister hialte pawh lo ni tawh Pu P.B.Nikhuma sunna thu sawi a ngai ta hi a lungchhiat thlak hle a. A chanchin tlangpui kan sawi hmasa ang a.

Pu P.B.Nikhuma, Ex-Minister hi April 11th 2018 zan dar 7:30-ah kum 89 mi niin Aizawl Civil Hospital-ah a boral a ni. Pu P.B.Nikhuma hi Pu Chhunbura leh Pi Chhingzovi te fa pathumna niin kum 1929 March thlaah Hnahlan khuaah a piang a. An unau hi 11 niin mipa 7 leh hmeichhia 4 an ni. Kum 1953 July 31st-ah Pi Chuaubuangi d/o Pu Kamlova nen Lunglei-ah an innei a. Fapa 6 leh fanu 2 an nei a, tu leh fa 34 an nei a ni.

Zirna lamah chuan Matric hi Residential High School, Imphal atangin a pass a. Kum 1952-ah Pu Buangthanga te sumdawwna puiin Manager hna a thawk a, Lunglei-ah a inbengbel ta a ni.

Kum 1963-ah politics-a lutin Mizo Union a zawm a. Politics a zawm kum hian Divisional Headquarters-ah Secretary atan thlan a ni, Divisional Headquarter chu Lunglei tihna a ni. UT election hmasa ber April 1972-ah Mizo Union ticket-in Buarpui Constituency-ah MLA-a thlan tlin a ni a. Pu Ch.Chhunga Ministry-ah hian Deputy Minister niin Medical & Family Planning Department leh Local Administration Department te a enkawl a ni. Mizo Union leh Indian National Congress in merger-ah General Secretary hna a thawk a. Hun rei tak chhung Bhavan nghaktu ber niin party hotuten MPCC Lifetime General Secretary mawhphurhna an pe hial a ni, a taimak vang leh pisaa a regular avangin.

Pu P.B.Nikhuma hi a phak ang tawka Pathian rawngbawlin TKP, Rahsi Veng Unit-ah President hmasa ber a ni a. Khawtlang tana theihtawp chhuaha rawngbawl thinin YMA-ah life member hmasa ber a ni bawk. Aizawl West

College-ah Managing Board Chairman hmasa ber a ni a. Kum 1995-1998 khan ZENICS Chairman a ni a, Dinthar High School dintu zingah pawh a sulsutu ber te zing ami a ni bawh.

Pu P.B.Nikhuma hi pa hrisel tak a ni thin a; tin, amah pawh hlim thei tak a ni. Mahse a kum a lo upat deuh hnu 2017 tawp lam atangin a hriselna a lo tlahniam tan a. February ni 26, 2018-ah CARE Hospital-ah admit a ni a. Chawlhkar khat hnu ah pawh that lam a pan loh avangin Aizawl Civil Hospital ICU-ah dah luh a ni. Investigation uluk taka tih a nih hnu ah a thluakah bawh (brain tumor) leh a chuapah pawh bawh awmin tui a tling tih hmuhchhuah a ni ta bawh a. Hma a sawn deuha hriat a nih avangin March ni 9, 2018 khan ICU atangin Cabin-ah sawn chhuah a ni a. A that chhoh zel beisei a nih laiin April ni 11, 2018 zan dar 7:30-ah chatuan ram min lo pan san ta a ni.

Kan sawi tawh ang khan Pu P.B.Nikhuma hi a hna tanna chu Pu Buangthanga & Brothers te sumdawna tanpuiin chhimlamah Lunglei-ah a awm a. Hmar lam mi ni mahse Lunglei-ah in leh lo ram hmun a va insawh nghet hle a. Mahse MLA a thlan a lo nih a, Minister nihna hial te a lo chan takah chuan helamah in bun nghet leh in leh lo a din a ni. Amah hi mi kawm nuam tak, mi taima tak a ni a, thusawi thiam tak a ni. Hmun tam takah politic avangin kan zin dun thin a. Vantlang inkhawmah leh hmun hrang hranga a thusawinaah ti ti thiam a nih bakah thusawi thiam tak a ni a, a thusawi a ngaihnaawm thei hle a ni. Tin, zokhaw pa te pawhin ti ti pui nuam an ti a, an bawr laih laih thin a. Chutiang chuan ama hnaah tlin taka thawk thin a ni.

Tin, Congress Bhavan-ah merger hnu ah leh merger hnua sorkarna kan chan loh te pawhin a taima pawl leh a nghak taima (Congress chhungkuaa kan sawi thin angin) Bhavan zuna uai te zing ami a ni a. Hetiang mi taima, party tana mi tangkai, House pawh ti zahawmtu lo ni tawh thin kan han chan ta hi channa rapthlak tak a ni a.

Tin, anmahni khawtlangah pawh mi tangkai tak a ni a, pa kawm nuam, ti ti thiam a ni. Tin, khawtlang tan a tangkai a, ka sawi tawh ang khan College dinnaah te pawh a tangkai berte zing ami a ni a, a sulsutu a ni a. Hetiang mi ropui, ram leh hnam tana theihpatawp chhuah, khawtlang tan pawh a in hmang, Kohhranah pawh theihpatawp a in hmang, he House-ah pawh rei tak lo khawsa a, a ti zahawmtute zing ami waviinah sun a ngai ta hi a lungchhiatthlak hle a. A chhungte a kalsan, a nupui fanau

te, a tu leh fate Pathianin awmpuiin thlamuan se tih hi kan tawngtaina a ni e, Pu Speaker.

SPEAKER : Opposition leader lam kha.

Pu LALRUATKIMA : Pu Speaker, vawiinah hian kan House member ni thin leh UT hunlaia Minister pawh lo ni tawh Pu P.B.Nikhuma sunna hunah hian opposition group leader zahawm tak Pu Vanlalzawma'n 'i pu a ni bawk a, nangin sawi ta mai che' min tih avanga lo ding chhuak ka ni a. Kan lo hrih lo palh che a, kan thiam lohah min ngaidam la.

Kan hriat ang khan kan House Leader zahawm takin a sawi ang khan Pu P.B.Nikhuma te hi nu leh pa zirtirtu an ni a. Ngopa khawchhuak niin, khinglai Rabung chhehvelah Hnahlan-ah te awm kual in Hnahlan-ah a piang a. Fa 8 an nei a, Pi Chuaubuangi nen khan nupa kawpchwaiin hlim takin hun an hmang a. Pathian malsawmna pawh fanauah nasa takin an dawng a. Chutihlai chuan mihringin kan tlin lo awm mang e aw kan tih an inneih Diamond Jubilee hial kum 2013-ah khan an lawm bawk a.

Chutiang chuan zirna kawngah Imphal lamah lehkha zirin Matric a pass a. Eizawna kawng zawhin Lunglei lamah a pem phei a. Lunglei-ah chuan nupui te va neini a inbengbel a. Politics bul tanin Mizo Union-ah General Secretary Divisional Headquarter-ah te niin chutiang chuan Pu Buangthanga hnuaiah Manager hna thawkin hun a va hmang a, 'Thlawhna-ah ration te an rawn thlak thin a, chung te chu mipui hnenah te, sipai-ah te supply hna ka thawk thin a,' a ti a. Thusawi thiam a ni a, ngaihnaawm takin thil fiah takin a sawi thin a. Chumi hnu ah chuan UT election 1972 khan Buarpui Constituency atangin MLA atan thlan tlin a ni ta a, Pu Ch.Chhunga Ministry, 26th July, 1972 khan Deputy Minister ni turin lak luh a ni a, chutah chuan Medical & Family Planning leh LAD te a enkawl a. Medical & Family Planning hi tuna Health Department ang hi a ni a. Nimin lamah member zahawm tak Pu T.Sangkunga nen hian a sulhnu te Assembly House-a proceedings te kan han en a, Assembly zawhna leh chhanna chhanna te leh a Demand sawi te, a wind up te a ngaihnaawm khawp mai a, Mizo tawng a thiam a, thusawi a thiam hle a, mi chhuanawm tak niin ka hria. Kan ngaihlak tawh ang khan party hotute duhsakna dawngin MPCC lifetime General Secretary mawhphurhna an pe hial te hi (a hmingin chhungkua ang te pawhin han sawi ta ila, a mawi lo turah min lo ngaihsak lo ula) party hotute duhsakna chungah pawh lawmthu ka han sawi tel ni sela. Kan pu P.B Nikuma hi mi taima a ni a, sangha dil leh huan siam mite tihhmuh tum tlat mi a ni a,

khulai kan thlang lawk Tuikual mawngah khuan tun thleng hian sangha dil tha tak mai a la nei a. Rose huante siamin pangpar huan te a buatsaih a, Florist Association-ah te pawh hian bul tumtu niin pangpar khawite hi eizawna tlak a ni tia mite tihhmuh tute zing ami a ni. Ram leh khawtlang tan theihtawp chhuaha bei mi a ni a, YMA-ah chhinchhiah tlak tak chu Life member hmasaber a nih kha a ni. Aizawl West College-ah Managing Board Chairman hmasa ber niin Dinthar High School dintu te zingah te telin mawhpurhna pawimawh tak tak te a la a.

Tin, 1995-1998 chhung khan ZENICS Chairman mawhpurhna a la bawk a. Amah hi inzirmi a ni a, kum 89 mi a ni tawh a, amaherawhchu nikum a damloh hma te khan online-ah internet atangin a mamawh ang chu a chah ve thei a, facebook, engkim social media kan tih te pawh hmang thiamin online news te hi internet atangin a chhiar mai thin a, chutiang chu Mizo pa ah hian kan tam lo khawpin ka ring. Mi inzir mi tak mai a ni, chungte chu ka han sawilang duh a. Taksa bawhsawmnain nikum kum tawp lam khan a tlakbuak tan a, brain tumor leh a chuapah bawk hmuh a ni a, enkawlna hrang hrang dawngin duhsaktu kohhranho tawngtaipuinat, thenrual tha te leh party-a a thawhpui, ram tana a thawhpui te duhsakna pawh nasa takin a dawng a, a natnain zual lam pan in 11th April khan min kalsan ta a.

Pu P.B Nikhuma, ram leh hnam vei mi, pa taima tak mai sunna hun he House-ah neih a ngai ta mai hi i vei lam amite hian pawl kan ti hle mai a, kan ui takzet a ni tih hi he House kaltlang hian ka han sawi duh a, a kalsan tak a chhungte Pathianin thlamuanin awmpui zel se tih hi kan tawngtaina a ni e. Ka lawm e.

SPEAKER : Sawitu dang kan ko ang, Pu Romawia.

PU R.ROMAWIA, MINISTER : Pu Speaker, hun min pek avangin ka lawm e. Pu P.B Nikhuma hi Pa Nia ka ti mai thin a, ka pa te Union hotute zing ami, chhim lam an lo ni a, Pu Nia hi an belh pui ber a ni thin a. Chhim lama Union hruaitu pui ber a ni a, khang lai khan mithiamte an la tlem a, Pu Nikhuma hi khati lama kan mithiam zing ami a ni a, chuvangin 1972-ah pawh khan Buarpui bialah khan hneh taka thlantlin kha a ni a, kan hriat ang khan Lungleia kan mi hlun Bazar veng kan mi hlun fanu neitu kha a lo ni bawk a. Chhim lam khan chhim lam mi pangngai diktak ang an pawm hmiah kha a ni a. Kan ngaithlak tawh ang khan khatiang kha a dinhmun chho a ni a. Party-ah rim takin party policy diktak vuan a chho a ni a. Ka han sawi duh ber zawk chu tun tlai khaw hnu ah a kum a tam hle tawh mai a, khatah khan Pu Sainghaka bial thihsan ah khan bye-election a kan zin

khan khiti lamah kan han riak chho a, khang ah te khan thlen in te khan, “ Ka pu, khum a awl asin, khumah mu teh,” an tih te khan, “ Ekhai, keini te chu politician kan ni a, chhuat hi kan talna tur a ni,” a ti a, chhuatah a mu lui tlat mai a, keini a naute pawh khum min kian mahse han kai ngam chi zia zang kha a ni lo a. Chuti khawpa Zopa rilru leh politician inphahhniam peih rilru a nih kha vawiin thleng hian he House pawhin kan theihngilh loh atan ka rawn sawi chhuak duh a, khatiang anga kum upa tak a ni chung pawhin ram leh hnam a veina leh mipui level ni tura a inhriat tlatna lai kha kan entawn zel atan a tha hlein ka hria. Thil dang tam tak ka sawilo ang a, chu chu a uihawmna em em niin ka hria a, ka rawn dinchuah pui a ni. Pu Speaker, ka lawm e.

SPEAKER : Pu P.B Nikhuma, Deputy Minister a nih lai khan Deputy Speaker niin kan in thenawm a, kan kawmchhak lawkah a awm a, thenawm tha tak, ngilnei tak, thenawmte ngaihsak tak a ni tih kha Chair atang hian han sawi ve lawk ka duh a ni.

Tunah chuan a vanduaithlak kan tih laiin a vanneihthlakna lai a awm a, a sunna ah hian member zawng zawng kan kim ni niin ka hria a, chuvangin Pu P.B Nikhuma hian vanneihna tak a nei a ni. Tunah hian amah sun nan leh kan zah entir nan minute khat chhung ilo ding ang u. (**Member te ngawi rengin minute 1 an ding**)

Tunah chuan business dangah kan kal thei ta a, kan hriat angin tahrrik ni 20.6.2018 khan keima room ah Business Advisory Committee kan thu khawm a, tun session chhunga kan thil tih tur programme duan lawk a ni a, chumi copy chu kan sem vek che u a, BAC Report kha House-in kan pawm a ngai a, kan pawm thei mai lawm ni?

PU LALRUATKIMA : Pu Speaker, khawngaihin BAC Report kha la sem hma khan...

SPEAKER : A copy kha chu nakin ah kan sem dawn alawm, enge sawi duh i neih?

PU LALRUATKIMA : Kan pawm hma khan thil sawi duh pakhat ka nei a, khawngaihin i remtihnain. Pu Speaker, summon hi Governor khan 11th June-ah a ti chhuak a, mahse notification hi ni 12th June-ah ni 27-a tan turin ka hmu a, ni 12-ah pawh hian zan dar 8:00 velah ka hmu a, member zahawm tak Pu Zoram Sangliana phei chuan kei aiin ala hmu tlai a, a la sign lo tlat a. Kan Dan bu-ah hian tihian a inziak a, Chapter II, Section III-ah hian, “ The date and place for session of

the House, atleast 15 days before the date of commencement of the session,” a ti a, Session tan hmam ni 15 a awm tur a ni tihin ka’n let ve ngawt a. Chuti a nih si chuan ni 12th zana kan hmuh kha ni 15 a tla ta hauh lo mai a, zawhna leh chhanna hun hi kan hawng thei ta reng reng lo a. Kan Dan bu Chapter 8, section 36-na ah hian, unless the Speaker otherwise directs not less than 15 clear days notice of a question shall be given,” a ti leh a, 15 clear days zawhna thehluhna ah khan kan mamawh si a, zawhna thehluh theihna hun kha min pe ta reng reng lo mai a ni. Chutih lai chuan helai ah hian session koh chungchang proviso a dah a, emergency a nih chuan Session hi koh theih a ni a tih ni a, short notice on emergency a ti a, mahse emergency a nih thu hi he summon-ah hian a awm bawk si lo va, 15 days a tla bawk si lo va. Pu Speaker, ka chhut vang vang a, ni 12.6.18 atanga han chhut chhoh hian ni 15 thleng tur chuan ni 12 atanga chhiar tel a ngai tlat mai a ni, engatinge aw ka ti a. Kan tihsual chu kan tihsual ni se, tunhnu atan kan in siam that theih nan, emergency ni se chuan a tha viau tho a, emergency lutuk a nih hmel chuang si lo va. Zawhna hun kha kan nei thei ta reng reng lo mai a. Member te hi mipui aiawh kan nih avangin member te zalenna khalai khan min rapbet niin ka hria a. Khatiang a nih loh rau rau chuan zawhna hun kha min pe tura ka ngaih laiin summon hi short notice ang maiin kan rawn tichhuak ta a, he House zahawmna pawh hi a tichhe palh ang tih ka hlau hle mai a, tunhnu zelah fimkhur nan hmang tawh ila. I Chair zahawm tak kha rawn tihmualpho tum che ka ni lo, i mawhphurhna a ni chiah lo a, PAD lamin summon kha an rawn muanchan deuh niin a lang a. Chuvangin 15 clear days tlaa member ten zalen taka session, emergency a nih loh rau rau chuan, hun kan hman hi a tha. Chutah chuan sawi tur tam tak ka nei a, lei chim te pawh kan sawi duh a, kan dawh that dan tur te pawh sawi kan duh alawm, khang hun awm lova session zalen tak si, vawiin chauh emergency chu ni sela naktukah official business dang zawng zawng kan kalpui theih vek laia, member zahawm tak te min rapbet lutuk deuh em aw tih kha he House zahawm tak kaltlang hian ka rawn sawi duh a ni e. Ka lawm e.

SPEAKER : Hei chu hmanni khan kan sawi tawh a....

PU LAL THANHAWLA, CHIEF MINISTER : Pu Speaker, kan hotute hi an fimkhur khawp a, Parliamentary Affairs Department changtu Minister te, Speaker te leh kei pawh (a hmingin) inrawn tlanga ti kan ni a. Tin, he session hi a emergent em em a ni, a chhan chu Lotteries Amendment Bill-ah te puhmawh tur kan in zawng ang tih kan hlau a. Tin, Sinlung Hills Development Council Bill chungchangah a emergent em em bawk a, a chhan chu inremna kan siam a, inremna kan siam zawh nemnghehna turin Bill kha pass a ngai a. Tin, engtikahnge inthlan hi

an rawn puan ang kan hre lova, central lam khuan an duh hun hunah an puang tih tun inthlan kal tawh hovah khan kan hria a, chuvangin thlaruk (6) a tlak lohna turin a karah session neih a ngai a ni. Tun hi a department concerned ten an lo ziak lo a nih pawhin emergent session a ni.

PU LALRUATKIMA : A lawmawm e. Pu Speaker, kan inremna “Memorandum of Settlement between the Government of Mizoram and Hmar Peoples’ Convention Democratic” kha ni 2 April, 2018-ah an nei daih tawh a, a ni leh thla ang zawng pawhin thla 2 dawn a tla tawh a (**SPEAKER** : Kha chu kan la sawi thleng lo, nakinah sawi hunah kan sawi dawn nia) emergency ti a zawhna hun inpek loh ngawt kha, emergency tih kha chu dah ula a dik mai a, an dah baw si lo va, kan rights min palzut deuhin ka hria a, ka han sawi duh ve a ni.

SPEAKER : Awle, a chhiar dan kha heti zawngin chhiar ve thung ila, 12, 13, 14, 15, 16, 17, 18, 19, 20, 21, 22, 23, 24, 25, 26 ti hian sawmpanga (15) chiah a tla a, 26-ah khan. (**PU LALRUATKIMA** : Pu Speaker, zanah kan hmu chauh a ni) Zan chu ka sawifiah dawn alawm, ngaithla rawh. Zan kha Pu Sawtliaana chuan zanlai atangin zanlai thleng vekin a lo her chhuak a ni a ti, kum khat hi. Chuvangin, ni 12 dar 8:00 P.M. kha chhun a ni tho, dar 12 a thlen hma kha chuan. Ni chhiar danah zan pawh kha chhiar tel a ni, zanlai atangin zanlai thleng vekin a lo her chhuak a ni tih a ni, chuvang chuan kha kha hrethiam hram rawh u, ni 15 a tla chiah. Amaherawhchu emergency sitting tih an telh kher lo kha in ti a nih chuan chu chu Chief Minister zahawm tak khan a sawi tawh a, inziak kher lo mahse emergent a ni tih kha a sawi tawh a, i hrethiam ang u.

Dr. K. BEICHHUA : Pu Speaker, tah khan emergency tih kha in ziak si lo va, question lo siam dawn ta ila, 15 days i chhiar kha pakhatmah kan siam thei lo a ni, chuvang chuan hei hi in tilui a ni, question kan siam in hlau a ni lo maw tih hi kan ngaihdan a ni.

PU LAL THANHAWLA, CHIEF MINISTER : Pu Speaker, kan hlau miah lo. Khuarel chhiatna chungchangte pawh hi chhan kan chak khawp asin.

SPEAKER : A hlauh thu ah chuan hlau lovang. Amaherawhchu, tihsual palh a nih te chuan kawng dang awm sela. A hlauh lam kha chu hlauhawm a awm lo tih kha hria ila.

Le, Business Advisory Committee Report ka present tawh a, kan pawm mai lawm ni. (Members : Pawm e) Aw, kan pawm a, a copy kha sem ni se.

PU VANLALZAWMA : Sem phawta pawm tur a ni lawm maw ni le, en pawh kan la en si lo va. A copy pawh kan la hmu bawh si lo va.

SPEAKER : Tunah chuan business dangah kan kal thei ta a - Laying of Papers. Minister zahawm tak Pu Lalsawta sawm ila, paper lay tur a neih ang lay turin.

PU LALSAWTA, MINISTER : Pu Speaker, His Excellency, the Governor of Mizoram-in a recommend ang leh i phalnain he House-ah hian “The Mizoram Lotteries (Regulation) Amendment Rules, 2016” copy hi ka rawn dah e.

SPEAKER : A copy kha sem ni se. Tunah chuan legislation-ah kan kal thei tawh a, Bill pakhat kan nei a. “The Sinlung Hills Council Bill, 2018”, a Bill neitu Minister zahawm tak Pu R. Lalzirliana, Home Minister-in introduce phalna rawn dil se, amah i sawm ang.

PU R. LALZIRLIANA, MINISTER : Pu Speaker, “The Sinlung Hills Council Bill, 2018” hi he House zahawm takah introduce ka rawn dil e.

SPEAKER : Kan phal maw? House-ah introduce a rawn dil a, introduce kan phalsak maw? Awle, tunah chuan introduce se la, sawiho turin move nghal mai tawh rawh se.

PU R. LALZIRLIANA, MINISTER : Pu Speaker, kan Bill hi a chhah angreng viau a, mahse a kalphung pangai ve deuh mai kha a ni a. Helaiah hian hriatthiam loh te kan neih a nih chuan.

Chapter 36, Clause ‘c’-ah khan “is not register as a voter in the electoral roll of the Village Council within the State” a ti a. Engemaw han hnial hrat ve hrim hrim tan chuan “definition-ah State” tih kha a awm lo va, amaherawhchu Sinlung Council a hman tur Bill niin hei hi Mizoram piah lama Dan hman tur a nih loh avangin definition-ah chuang chiah lo mahse Mizorama a kawh a ni kan han ti a. Tin, section 43, clause 4-ah khan ‘The following shall be deposited to the general council fund’ tih (b) ah khan – All receipt on account of the nation rates a ti a, rates hi engnge ni tih awl angreng tak a ni a. Heng hi tax te leh fees te sawifiahna atana an lo hman ve thin a ni a, he lai hi a dik lo ti kan awm a nih pawhin local people tan phei chuan helam hi a kawh niin kan hria a, chu chu ka hrilhfiyah thiam dan a ni e.

Tin, section 53-naah khan Members, Officers and Employees to be public servants a ti a, helai ah hian a hrilhfiyah lehna a ah hian ‘The Chief Executive

Member and the Executive member shall be deemed to be public servants within the meaning of section 21 of the Indian Penal Code' a ti a, he lai ah hian Officer te leh Employees te hi a dah leh si lova tih zawhna awm thei tak a ni a, hetiang hian chhiar ta zawk ila patent error emaw, correction siam emaw kha min phalsak mai turin House hi ka han dil nghal a ni.

The Chief Executive Member, Executive member, Officers and Employees tihtur kha niawm tak a ni a, kan ziak tel lova hriatthiam theih awm tak a ni kan ti nge ni ka hrechiang lova, kha lai kha han ziahrem theih deuh a nih chuan hon. Speaker phalna ka han dil nghal a, He Bill 'Sinlung Hills Council Bill 2018' kan han pulut ta mai hi a lawmawm hlein ka hria a, a hma lam history leh hetiang bill a lo ngaih takna leh kan han puitlinna hi helai House zahawm takah hian memberten kan hriatsa mah ni sela han hrilhfiar tulin ka hria a, chuvangin Pu Speaker, member zahawm tak ten helaia ka thusawi hi min lo ngaihlaksak turin ka ngen a ni.

Mizoram hmar chhak lama kan Mizo unau khawsa Hmar hnam thenkhatin sorkar laka beisei hrang hrang an neih avangin innghirnghona leh inhmuhthiamlohna hun rei tak kan lo nei tawh thin a. Hnam tih dan phung leh pi leh pute atanga chhui pawhin Hmar unaute hi hnam ang pawhin Mizo hnahtlak, tawng erawh a hrang hmang mai an niin a hriat a. Kan hriat angin kan Hmar unaute hi state thenawm hmun hrang hrang Assam ram North Cachar Hills District leh Manipur, Churachanpur District-ah te an awm ve bawk a. Hetia hnam hrang hrang zinga an awm vangte pawh a ni ang e, Hmar hnam zingah mahni hnam dikna leh chanvo humhalh duhna zawi zawiin a lo piang chho ta zel a. Hun hmasa lam daih tawh 1957 velah pawh heti lam zawnga hma la tur hian HNU – Hmar National Union te pawh an lo din tawh thin kha a ni.

HPC-in Autonomous District Council te an phut ta a, Mizoram-in remna leh muanna a neih hnu lawkah kan Hmar unaute zinga mi thenkhatte rilru ah hnam bil anga inhumhalh duhna leh a hranpaa inrelbawl duhna a lo lian chho ta hle mai a. Kum 1986 tawp lamah Hmar Peoples' Convention lo piangin Mizoram hmar lam ram a anmahni hnam bil tan Autonomous District Council an phut ta a ni. Hemi denchhan hian HPC zinga mi firfiak thenkhat ten silai kengin sorkar hmalakna dodal zawnga chetlak te an lo ti tan ta a, Mizoram Police- te nen pawh inkahna hial a lo thleng ta a. Mizoram hmar lamah boruak ralmuanglo tak, boruak rip tak mai a lo awm ta a. Hetiang boruak hi kum 1990 thleng vel a awm chhoh hnuah khatih laia Mizoram sorkar leh HPC te chuan inbiakna neiin 27.7.1994 khan Memorandum of

Settlement an ziafel ta a. Hetia remna thuthlung ziah fel a lo nih khan HPC rammu engemawzat leh an ralthuam engemawzat chu tun ve a ni a. Inremna angin Mizoram sorkar pawhin a theih angin HPC mi engemaw zat hnenah chhawmdawlina a lo pe tawh a. Tin, Sinlung Hills Development Council pawh din a ni ta a. Council huam chhungah a theih chin chinah sorkar department office-te pawh hawn belh a ni a. Sinlung Hills Development Council enkawl tur hian Interim Council din niin Adhoc Chairman leh Council member-te ruatin he Council hi enkawl chhoh zel a ni ta a ni.

Vanduaithlak takin HPC (D), Mizoram sorkar leh HPC inremnaa lungawilo pawl hi an lo piangchhuak a. Lalhmingthanga Sinate, HPC General Secretary thin chuan kum 1996 khan pawl thar Hmar Peoples' Covention Democratic chu hmar Khawlian,, Cachar District-ah a din ta a ni. HPC'D' te hi Nagaland rama hel pawl MSCNIM te nen pawh thuk taka inkungkaihna neiin anni tanpuina hian India ram pawnah te pawh training nei thinin ralthuam te pawh an hmang thin a ni. He pawl hi nasa takin sorkar duhloh zawngin an lo che tawh thin a, tuklaih chhiah te khawnin mi thenkhatte an kidnap thin a, Mizoram Police te pawh an lo ambush fo tawh thin a ni.

HPC'D' te hi kum 1994 inremnaa lungawilo te an ni ber a, he pawl dinchhan lian ber chu Mizoram hmar lama Constitution Sixth Schedule hnuaiia Autonomous Council din a ni a. Hmar unaute tana inrelbawlina hran din hi an thupui ber a lo ni thin. Hemi bakah hian 1994 inremna thuthlung chak zawka sorkarin a bawhzui theih nana hma la angin an insawi bawka a ni.

HPC'D' hruaitute zingah inhriatthiam lohna a lo pian tak avangin 29.9.2016 khan an President chu Pu H.Zosangbera, General Secretary hovin paih thlak niin thuangnihin he pawl hi kalpui a lo ni leh ta a. Chutihlaiin HPC'D' te hian sorkar do zawnga kal leh mipui mimir inkar tithlabar zawnga ralthuam lek chu an kalpui chhonzawm zel a. Heti lam zawnga HPC'D' te hmalakna zawng zawng chu waviinah hian kan sawichhuak vek seng lo a ni. Ralthuam kengin Mizoram hmar lamah tuklaih chhiah te khawn thin a ni a. Tin, Mizoram Police te pawh kapin an lo ambush fo tawh thin a, nunna hial te pawh chan a ni . Democracy ramin a ken tel Thingtlang lama roreltu Village Council inthlan tibuai zawngte in hma an la tawh thin a, 28.3.2015 khan Zokhawthiang daiah Mizoram Legislative Assembly Subject Committee te ngei pawh lambun an lo ni tawh a, kan Police mi leh sa te pawhin nunna hlu tak an lo chan tawh a ni. Heng bakah hian thil pawl tak chu HPC'D' hian kan Hmar unaute zinga an pawl lan mawi lehzual theih nan Mizoram chhunga Mizo

hnahtlak chengte inkarah hnam bil anga intihhran theihna tur hawi zawngin hmalakna te pawh an lo kalpui tawh thin a. Kum 2012 tir lam khan Mizoram hmar lam Hmar unaute tamna khua zawng zawngah YMA Branch din phallohna thupek hial pawh an lo chhuah tawh a ni. Hei hian khawtlang mipui khawsak phungah pawh harsatna nasa tak a thlen bakah Mizoram chhunga hnam hrang hrang te inunauna tichhe thei thil a nih avangin sorkar pawhin a ngai thutak hle a ni. Heng te bakah hian HPCD ten anmahni hnam bil anga ngaih theih tura Autonomous District Council an ngiat pawh hi sorkar-in ngunthluk taka a ngaihtuah hnuah Mizoram chhunga hnam hrang hrang khawsa te inunauna tiderthawng thei thil leh kan ram inpumkhatna tichhe thei thil nia a hriat avangin a dodal ta tlat a ni.

Inrem tura hmalakna : Hetiang hun harsa leh ralmuan thlaklo taka Mizoram hmar lam ram a awm mek lai hian remna lam hawiin boruak a awm chho ve zel a. Mizoram sorkar chuan heti lam hawi hian hma a la chho ve zel bawk a. Kum 2009-2010 a lo thlen chuan Sinlung Hill Development Council huam chhunga VC intelkhawm Village Council Co-ordination Committee te chuan Mizoram Chief Minister zahawm tak Pu Lal Thanhawla hnenah remna a awm theih nana hma la turin ngenna an rawn siam a. Tin, Central YMA atang pawhin an hnuai Serlui, Tuivai leh tuivawl group YMA ten thu an lo pass tawh angin remna a awm theih nan HPCD te inbiakna neih pui turin sorkarah ngenna an rawn siam bawk a. Chutianging Hmar Student Association leh Hmar Youth Association te pawhin ngenna an rawn siam a ni.

Hetih lai hian 2010 khan HPCD te pawhin state sorkar hnenah inbiakna neih an duh thu an rawn thlen bawk a. Tichuan 11/11/2010 khan Mizoram sorkar leh HPCD te aiawh ten inbiakna neiin thla ruk chhung atan inkahhai, suspension of operation puan a ni a, harsatna hrang hrang karah inbiakna hi 31/01/2013 khan neih chhunzawm leh niin suspension of operation chu thlaruk chhung atan puan leh a ni a. Sorkar lam pawhin inremna a awm ngei beiseina sang tak a nei chungin 14/08/2013 khan inbiakna hi Mizoram sorkar Secretary te leh GAD lam te palai tir in neih a ni leh a. HPCD lam ten 6th Schedule hnuai Autonomous District Council an phut luih tlat si avangin he inbiakna hi pamtul a ni leh ta a ni. Hetianga inbiakna a tlawlh tak ah chuan hun eng emaw chen chu remna hawi zawngin hmasawna a kal hleihei ta lova. Chumi piah lamah a hma lama sawi tawh angin Zokhawthiang daiah HPCD ten kan Assembly Committee leh a thuihruai te an lo lambun avangin sorkar lam atang chuan inremna kawng zawh tura ke pen pawh a harsa tlat a ni.

Sorkar pawl nasa taka an khawih tak ah chuan sorkar lam pawhin inbiakna chhonzawm a nih leh dawn chuan HPCD ten he inkah naa an ralthuam lak zawng zawng te an rawn pe kir vek tur a ni tiin phut an nei ve ta tlat a. Sorkar duhdan te hriain HPCD te chuan anmahni leh palai kaltlanga sorkar rawn dawrin in inbiak an duh thu an rawn thlen leh ta a. Tichuan 10/06/2016 khan state sorkar leh HPCD te inbiakna chu tharthawh leh a lo ni ta a ni. Official level-a inbiakna hi a thawhnhina ah hian tum 5, ni 21 & 22 Sept 2017-ah te neih a ni a. Heng inbiakna ah hian sorkar in a lo phut tawh angin HPCD ten sorkar ta ralthuam an lak zawng zawng te an rawn pe kir ta vek a ni, an inbiak chung hian. Heng inbiakna te hi boruak tha tak hnuaiah neih chhoh a ni thei a. HPCD lam pawhin tunhmaa sorkar an nawrna Autonomous District Council chu phut bur tawh bik loin tuna Sinlung Hills Development Council awm mek hi thuum thata SHDC huam chungah mahni bil thuneihna zau zawk nei tur a Sorkar remsiampui turin sorkar an beisei ta ber zawk a. Chutiang in tuna SHDC hi Sinlung Hills Council ti a thlak a thuneihna tam zawk nei tura state sorkar hmalaknaa dan felfai tak zama siam turin thu dah fel a lo ni ta a ni.

Official level-a inbiakna neih hnuaiah political level-a inbiakna neih hnuaiah ni 7&8 March 2018 khan hmawr bawk a ni ta a. He inbiakna ah hian member zahawm tak Pu Lalrinmawia Ralte leh Pu John Siamkunga ten sorkar lam hi an ho a ni. Political level talks-ah hian Memorandum of Settlement ziah hun tur te, HPCD rammu te an rawn chhuah dan tur te, anmahni chhawmdawlina tur atana pawisa fai pek dan tur te leh an ralthuam sorkar an hlan tak te lawmman pek dan tur te bakah Interim Council din dan tur te relfel a ni a. Tichuan, Mizoram leh HPCD te chuan inremna, Memorandum of Settlement chu 02/04/2018 khan ziah fel a lo ni ta a ni.

He inremna thuthlungin a tum ber chu (Bill-ah khan kan lut tawh ang a) Mizoram sorkar aiawh te leh HPC 'D' aiawh ten an pawm dun, inremna ruhrel huam chungah Sinlung Hills Development Council awm mek hnena mahni bil thuneihna zau zawk pek a ni a. He thuneihna hi Council area chungah mipui vantlang ei leh bar lama hmasawna leh hnam ziarang humhalhna lam hawi a ni ang. Hei hian Council chungah mipui te tan vantlang khawsak chawisanna leh sum leh pai lama hmasawna a nih tur ang a thlen tir rualin Council area chungah boruak ralmuang leh muanawm a thlen tir bawk ang. Hemi atan hian Sinlung Hills Development Council chu Chhinlung Hills Council-a thlak tura ruahman a ni.

Pu Speaker, he Bill chungah hian eng emaw 'thuneihna in pek hi sang lua e' tih emaw, 'heti mai chu a ni bik dawn em ni' tih te pawh member zahawm tak te

atangin a awm thei a. Amaherawhchu, inrem lo te inrem tura inbiak hian a lehlam thu ang zawng zawng hi a ni thei bik lo a, give and take a ngai a. A then kan chan ve a ngai a, a then annin an chan ve a ngai a. A then kan pek a an ui tak pawh min pek ve te pawh kha a ngai a, inrem tur chuan. Chuvangin helai hi thil harsa tak a ni a. Amaherawhchu, Zoram tan tunlaih India ram khawvelah transparency kan sawi ta rau rau bawk a. Transparent thei ang bera kan awm hian mipui te kan zalen tlang zawkin kan hria a. Chuvangin sorkar pawhin ui lovin phal takin kan han ti ve a, chu chu min hriatthiam pui kan duh a.

He Sinlung Hills Council hi inremna thuthlukna tar lan ang in Mizoram Legislative Assembly-in Dan a siam hmanga din tur a lo ni ta a. He bill hmanga dan bung leh chang zawm tur hrang hrang te hi Mizoram sorkar leh HPCD ten inbiakna an kalpui laia inremna atana a ruhrel leh a ruangam an lo pawm dun tawh te an ni a. He bill a provision tlangpui te chu hetiang hi a ni. Kan sawi seng dawn chuang lo a, a tlangpui te chauhin han sawi ta ila, Pu Speaker :

- 1) Mizoram sorkarin Sinlung Hills Council area atana Village Council area hrang hrang a bithliah tur huam chhungah Sinlung Hills Council din a ni ang.
- 2) Sinlung Hills Council chuan General Council leh Executive Council a nei ang. General Council-ah hian members 14 awm in chung zinga members 12 te chu mipui te thlan an ni ang a, members 2 te erawh chu Council rawn chungah sorkar ruat tur an ni ang.
- 3) Heng members 12 thlan chhuah atang hian Chairman, Deputy Chairman leh Chief Executive Member te thlan leh an ni ang. Helaih hian CEM han tih hi kan mutan ve lek lek a, Autonomous District Council anga han tih hi a dik dawn emaw ni le tih lam te sorkar lam atangin a awm deuh a. Amaherawhchu hei hi thil har a ni lo e kan ti tlang leh ta a ni.
- 4) CEM chuan member dang te atangin Executive member 4 a ruat ang.
- 5) General Council term hi kum 5 atan ruahman a ni.
- 6) CEM, EM leh Council Members te hlawh leh hamthatna dawn tur chu dan te sep, rules hmanga sorkar la siam tur a ni ang.
- 7) Sorkar in Sakawrdai emaw, Council area chhunga hmun dang emaw ah Council Headquarter turin a puang ang.

- 8) General Council te hi thla 4 chhungin vawi 1 tal an thu khawm thin ang .
- 9) SHC headquarter-ah hian Secretariat a awm ang a, chumi chu Secretary leh officer dang ten Mizoram sorkar atangin an vil ang.
- 10) General Council hian Council area huam chhung development hna thawhna lamah thuneihna zau tak an nei ang a. Council area chhunga ram inpekna kalpui chungchangah Site Allotment Advisory Board (SAAB) angin hna an thawk bawk ang.
- 11) General Council-te hian Village Council ten chhiah/fee khawn theihna an neihnaah sorkarin a bithliah angin fee leh chhiah te a la ve thei ang.
- 12) General Council atana election kalpui dan tur Rules sorkarin a duang ang.
- 13) Council tan hian sum bawm/fund kan ruahman a ni ang a, chutah chuan state sorkar leh hmun dang atanga sum dawn te dah luh tur niin, Council inrelbawlina kaihnawih leh Council huam chhung hmasawna ruhrel dinna atan te sum pek chhuah thin a ni ang.
- 14) General Council hian anmahni inrelbawlina leh hmalakna turin kum tin budget an siam ang a, sorkar ppawmpui turin an thawn thin ang.
- 15) Sakhuana thil leh khawtlang nunphung Hmar unau te hnam dan leh hrai bik khawih thei thil Dan siam a nih dawnin state sorkarin General Council a rawn thin ang.
- 16) General Council din a nih hma chuan sorkarin a theih anga hma in Interim Executive Council din turin Executive Member lailawk tur te a ruat ang.

Heng te hi Pu Speaker, a tlangpuia kan han sawi theih te a ni a. Tunah hian member zahawm tak ten min sawipui, tha zawka siam dan tur te a awm emaw, paih tur emaw, belh tur emaw a awm a nih pawhin, chumi chu zau taka nangmah pawhin min pawmpui ka han dil a ni e. Ka lawm e.

SPEAKER : Minister zahawm takin a Bill putluh chhan te, a Bill awm dan tlangpui te min hrilh tawh a. Tunah chuan sawihona hun kan nei tawh ang a. Sawihona ah hian minute 10 nge minute 5, a tawk mai em? Thutlukna a awm tehchiam na nge? A nih leh minute 10 inpe ila. Minute 10 kha an sawi rik deuh ber a ni a. Tunah sawi tan ang, tunge sawi hmasa ang? Pu Piana.

PU R.L.PIANMAWIA : Pu Speaker, ka lawm e. Vawiinah “The Sinlung Hill Council Bill, 2018” he Assembly-a ngaihtuah pass tura rawn chhawpchuah a ni hi lawmawm ka ti hle mai a. Heng ang ngaihtuah theihna huna sawi ve theia min siamtu Pathian chungah lawmthu ka sawi a. He thil lo chhuahna atan hian kawng bumboh tak tak zawh chhuah a ni a, chumi avang chuan HPCD lam te, sorkar lama hnathawktute leh civil mi te pawh nunna chan tam tak an awm a, vawiinah hian kan theihngihl thei lova.

Tin, nichina kan Home Minister-in a sawi, Zokhawthiang daia Committee kal kha Subject Committee a ti a, a dik lo a, Assurance Committee a ni a, kha kha Pu Speaker, a remchan chuan correct leh ni se a thain ka ring. Chutiang chuan vawiinah inbiakna atana hmalakna nasa tak a kal tawh hnuah political level, a tawp kharna tak taka thu khirh lai tak maiah kan thawhpuite Pu Lalrinmawia Ralte leh Pu John Siamkunga ten, a tawp mam taka min han neihpui thei te pawh hi an chungah lawmthu ka sawi a.

Vawiinah hian ngaihdan hrang hrang te a awm thei ang a, amaherawhchu he inremna kan siam taka hi inrintawna tak tak atanga tih a ni hi ram mipui hian kan hre lo ang tih a hlauhawm hlein ka hria a. Sorkar lam pawhin HPCD palaite a ringtaw em em a. Tin, HPCD lamte pawhin sorkar an ringtaw em em hi a lawmawm ka ti a, hetiang inringtawn taka inbiakna, inremna kan han nei thei mai te hi a lawmawm ka ti tak meuh meuh a. Hun harsa leh hun khirkhan te, a lehlam zawng chuan ngaihtuah chhuah loh theih loh te pawh a awm ve thei a, khatiang hun khirh takte let tawh lo tura, hmalam pana, hmasawna kawng dapa kan han kal thei tur hi bial mipuite aiawh pawhin lawmawm ka ti a, lawmthu he House kaltlang hian ka sawi a ni.

Tin, inbiakna atana tha leh zung sengtu kan CID hote leh kan sipaite theitawp in chhuah a ni tih kan hria a. In thawhrimnaah lawmthu ka sawi tak meuh meuh a, heng thlen tur hian sorkar leh HPCD te inrintawna hi tih pelhsawlh duh awm ta se, CID ah hian tih pelhsawlh theihna chance tam tak a awm a ni tih kan hria a. Amaherawhchu chutiang ni lova ram neitu thinlung pu tak taka he hna in thawhnaah hian kan CID hote leh kan police hote pawh lawmthu vawiinah hian ka hrih tak meuh meuh che u a.

Tin, hun lo kal zel turah pawh he inremna hi a puithunna theihna tur chuan HPCD leh sorkar ringawtin a tihpuitling theih tur a ni lo a. Ram mipuite kan zavaia tanrual a pawimawh a. Tin, hemi atana tawngtaina hmangtu zawng zawngte pawhin

bang lova he inremna hi a lo puitlin zel theih nan tawngtaina hmang chhunzawm zel turin mitinte ka sawmin ka ngen bawka. Tin, tawngtainaa he inbiakna hlantu zawng zawngte in tawngtai rah a nih ang ngeia, a ven zuinaah pawh mawhpurtu in ni kan ni tih kan hriat thar a tul hlein ka hria a. Chutiang tur chuan ka chah duh a. Chuvang chuan “The Sinlung Hills Council 2018” hi lawm takin he House hian pawm thei ila; a lawmawmna, a hlutna hi kan sawi chhuak thiamlo a nih pawhin kan han sawi chhin atang pawh khan in ngaihruat theih ka ring a. Chuvangin hei hi sawisel mai lovin hlim taka he inremna thuthlung puitlinna tur atana Home Minister zahawm takin Bill a rawn chhawpchuak hi lawm taka pawm tlang turin member zawng zawng te ka ngen che u a.

Tin, thil pakhat General Council member tur chungchang kha tihdanglam leh theih a ni ang em aw ka ti a, helai inziakah hian mipui thlan tur kha member 12 a ni a sorkar lam atanga ruat tur kha 2 a ni a, a hmaa lo kal tawh dan ang kha chuan sorkar lam ruat kha member 3 a ni a. Chuvangin HPCD area-ah hian MLA 3 kan awm a, sorkar aiawh han ruat leh tur awm a kha a bai dawn deuh tlatin a hriat mai a, sa hrang inchankim law law kha tih dan a awm em tih ka rawn sawi tel ni sela. Pu Speaker, ka lawm e.

SPEAKER : A lawmawm e, minute 5, minute 6 chhungin a duh zawng zawng a sawi zo thei a ni. Khatiang kha a tha. Pu Z.S. Zuala i lo sawm ang.

Lt. COL. Z.S. ZUALA : Pu Speaker, tun ni 30 lo awm tur hi Remna Ni a ni dawn a. Remna Ni rawn thlentute bawka khan hetiang ang remna dan an rawn siam chhuak hi a lawmawm hlein ka hria. Hetah hian a zia a, ‘The area of the Village Council as may be notified by the Government’ a ti a. A area te, a boundary te hi hriat a chakawm viau mai a. Map te pawh hi nei thei ila chuan kan chiang deuh ang a. A lan dan chuan constituency 3 chhung ami niawm tak khan a sawi a. Section 19-na ah ‘Taxes and royalty’, entirnan khami chhunga tax leh royalty balu(sand) tih te; tin, forest product hmunphiah producing area an ni a. Kha kha state sorkar nena in share dan turte kha la tihfel turah ngai ta ila. Tin, an thuneihna, power to acquire a ti a, ram development ti dawn ila ram acquire-ah hian an buai a. Tuirial Hydel Project te pawh kha an area tur a lo ni mai thei a, kha kha tun atang khan example kan hmu tawh a. Khatiang ang power inpek dan kha fimkhur taka insiamsakna kha a Rules khan a rawn kengchho turah ka ngai a. Tin, moveable property, immoveable property thlang khan thuneihna an nei dawn niin a lang a, kha kha enpui a, tha hle turah ka ngai a. Tin, delimitation siam dawn hian a tituten uluk

taka an tih a ngai dawn a ni. A rualkhai em? Voters member thleng khan engtiang in nge an insemrual ang tih te, tihtur chu a la tam mai dawn. Tin, kan hriat theuh angin khi lai bial khi Manipur border a ni a. Manipur-a an inthlan dan culture te pawh kan hria a. Tin, fund hi engtiangin nge an tih dawn? Direct funding tih ang thleng khan state chhunga tih ngei tur chu niin a lang a. Khami ah khan thuneihna sang zawk an pe dawn nge tih kha nakinah an rawn sawichian theih chuan hriat a chakawm deuh a. Tin, District Council Area chhungah hian trade, sumdawnna hi an thlah zal angreng a. Traders hi an free duh viau mai a. Hetah pawh hian fimkhur hle chu a ngaiin ka ring. Kha kha nakinah Dan siamtuten la en chhoh zel ni ta se. Tin, hei hi dan tha tak mai a ni a, ka hmaa sawitu Pu Piana khan a rawn sawi tawh a. Kan sorkar tirh khan khawthlang lamah BNLF ten kan mite an kidnap in in lakchhuah nan an duh zat zat an chhiar a. A then laiah pheih chuan pawisa tam taka inkhul chhuah a ni. Kha kha kan sorkar hotute hmalakna zarah a reh ta duak mai a. Hei pawh hi a lawmawm a. Tin, chutiang bawkin khilaiah kan hriat angin Assurance Committee MLA hote kha an lo ambush a, kan sipai 3 lai kha an thi a nih kha. Khang te kha a reh ta duak a.

Tin, keipawh hian experience tlem azawng chu ka nei a, kan in te kha an han bomb a, an tichhe nasa a. Kan biala kan worker te leh YMA ten hnatlang in min han thuam a, a lawmawm khawp. Khatiang chi ho kha hemi hian a sort out dawn niin ka hria a. Kan hotute hmalakna hi a ropui hlein ka hria. Remna leh Muanna hi kan thleng dawn a nih chuan engtiang pawhin kan hotute hi an inphahhniam duh tih a tilang khawpin ka hria. He Dan hi a tha a, remna leh muanna a kawh hlein avangin pass ngei ni se tih ka rawn sawi duh a ni e. Ka lawm e.

Er. LALRINAWMA : Pu Speaker, ka lawm e. Vawiinah Sinlung Hills Council Bill kan han pass thei tur hi lawmawm hlein ka hria. Sawi tur a tam khawpin ka ring a. Tin, Remna Ni a lo hnai dawn bawk a. Ka hmaa member ten an sawi ang khan heng hunte nen pawh hian a inmil khawpin ka hria. Tin, thu dang sawi hmain a Dan chhungah hian tlem han ngaimawh ve deuh ka nei a, thahnemngaihna thute pawh a ni ang a. He Dan hi a hminga MLA kan nih hnuah Dan hrang hrang kan pass tawh a. Kan pass tawh reng reng hian, nichina member zahawm tak sawi ang khan a hmanna tur huamchhung kha fel taka ziah zel a ni a. Vawiinah erawh chuan Section I-ah khan, 'it shall extend to areas as may notified in Government from time to time' a ti tawp mai a, a hmanna tur bithliah a la ni lo lai hi a danglam khawpin ka hria, kan Dan pass tawhah chuan. Engpawhnise, hei hi engnge a awmzia? Thil ril zawk te pawh a awm a nih ka ring a. Dan kan pass dawn

a, Dan kan hmanna tur hmun Dan pass a nih dawn laia sawifel theih a ni lo lai hi a khingbai deuh riauin ka hria a. Khalai kha ka han sawi duh a.

A dawt leha ka sawi duh chu nominated seat chungchang Section V-na, General Council chungchangah khan nominated seat kha 2 a awm dawn ni khan a lang a. Heng nominated seat te hi tute nge an ruat ang tih lai hi ziahlan theih ni se a tha khawpin ka hria. State dang atanga Council Bill te pawh hi ka'n en a, anni chuan tluangtlam takin an ziak lang nghal mai a, hmeichhia an dah tur thu emaw, sakhaw hruaitu an dah tur thu emaw, minorities an dah tur emaw kha felfai taka ziahlan a ni thin a. Amaherawhchu, vawiina kan Dan-ah hi chuan ziahlan a awm lova. Nominated seat 2 a awm ang tihah khan kan tawp mai a. Helai hi nakina la inhnialbuai theih thil awmthei niin ka hria a. Chuvang chuan heng hi chiang zawka ziah ni se chuan a tha khawpin ka ring. Tin, Section 16-naah hian Secretary ruat chungchanga a extention hi kan ziak chiang tawk em aw, ka ti a. Section 16 Sub Section 5-naah hian, 'the term of appointment of Secretary shall be a period of 3 years, but may be extended by the Govt. in consistent with the Executive Member' a ti tawp mai a. A pawh sei hun tur kha a sawi tawp mai a, a hun leh zat kha a sawi si lova. Hengte pawh hi engnge ni, duh chen chen kan sawn mai dawn em ni tih laite pawh kha rilruah a lo lang a. Engpawhnise, thil tha zawk te pawh a ni turah kan ngai nge ni, a chiang lo riaua hriatna ka nei a.

A dawt leha ka sawi duh chu, Section 36-na, disqualification for members of General Council ah hian General Council member ni thei tur hian kum 18 chin hi kan ti a, hei hi an naupang mah mah em aw ka ti! Kum 18 chu la naupang ve vaw tak mai an ni a. Sub-section C-na ah hian Electoral Roll of the Village Council within the State, State chhunga a inregister lohin tih kha a ni a. Tin, helaiah hian ka rawn sawi lai chu hemi Village Council tur hian a area huamchhung ami te chauh kha a ni em tih lai tak kha chianguang taka ziahna a awmlo niin ka hria. Pawnlam ami in duh duhin an va chuh kual thei tihna em ni tih lai hi min han hrilhfiah se. Keima ngaihndan pheih chuan, 'within the constituency' ti se chuan a zia deuhin ka hria. State pumpui chhung ami a ni ang tih tawp mai kha chu! Council Bill dang, state dang kan thlir chuan, khami constituency huamchhungah tak a nih loh kha chuan hengah hian a tel theihloh reng reng a. Amaherawhchu chutih lai karah chuan state chhungah a nih loh chuan a ziaawm a. Chuvangin kan khawchhung ami a nih loh chuan khang te kha. Council area huam chhung ami tan lo pawh a chuh theih dawnin ka hria a. Helai hi min hrilhfiah theih chuan a lawmawm ngawtn ang. Chumi a nih loh chuan a dik dawn in ka hre lova. Within the state ti mai lo hian within the

council a tih hi ka lo beisei dan a ni a, khami area huam chhunga mi chauh council member ah hian tel turah ka ngai a. Mahse a hrilhfiahnah hian Village Council chu Village Council Act hnuai 'Village Council' tih ang khan min hrilhfiah leh bawk si a. Chuvang chuan he Village Council huamchhung a tih hi Mizoram Village Council huamchhung a tih hi kan khaw chhung atang pawhin a chuh ve theih dawn a, General council member nitur hian. Thil in tuha lo deuh ni a hriatna ka nei a ni. India rama Council Bill dangah pawh ama area chhung atang ngeia member hi ni turin a lang a ni. Council area pawnlam atangin miin an chuh si chuan hnial theih an nilo ang tih a rin theih a ni. Hemi Council member-ah hian hmun thenkhatah hian a bialtu MLA te ex officio ah hian an dah ve thin a, hmundang ah hian. Keini chu an ti ve lemlo va. AMC-ah pawh a bial chhunga MLA te chu ex officio-ah pawh an awm ve a, a tha khawpin ka hria a. Chuvangin hengte pawh hi kan ngaihtuah a, kan sawi ve hrim hrim a ni tih ka sawi duh a. Tin, Section 42-na fund chungchanga ka sawi duh chu ka hmaah khan Mmember zahawm tak khan a sawi tawh a. Fund hi state sorkar treasury kaltlang vekin ni se tih hi ziahlan ve ni se tih ka ngaihtuah a. Kan House Leader pawhin a sawi tawh tho a, District Council huamchhunga sum leh pai enkawl har zia te pawh kha kan sawi in ka hria a. Estimate committee ah te, PAC Committee ah te kan awm a, kan kalna hrang hrangah autonomous body hrang hranga sum enkawl hi a har em em a ni.

Ka ngaihndan chuan provisio emaw dahin hemi chungchangah hian state sorkar-in sum a pek tawh pre review-na leh an tih tur an ti em tih provision kha chu dah ila a thain ka hria. Pawisa kan peka kan sezawl chhuah tawp mai kha chuan hmasawanna a ram mipui tan a awm tam thei ang em tih hi ngaihtuah tham a tling a. Chuvangin state sorkar hotute kha an nu leh pa kan nih ang ngeiin sum leh pai an hmanna leh hmasawanna kawnga an hnathawh tur endikna kawng ah khan Dan bung leh chang kha belh theih ni se chuan mipui tan pawh a thlamuan thlakin a hlimawmin ka ring. He council area chhungah Constituency 3 a awm chuan voter chu a constituency ngaihtuahin a tlemin ka ring a. Inkhelhna sang lutuk te kha a chhuak thein ka ring. Chuvang chuan helai hi dah belh atan rawtna ang deuhin ka sawi a. A tawpa ka sawi duh chu hetiang a inremna a lo awm ta hi a lawmawm em em a. Vawiina kan inremna, kan thuthlung ziah a ni ber ang chu tihlawhtling tur chuan kan inrintawanna a pawimawh ber a. Heng Dan te pawh kan pass ngam ta rau rau a nih chuan pe ngam ve ta law law ila tih hi ka rilruah a lo lang a ni. Chumi ni loa helai atanga ti kual a, thawk hleithei lova kan ti kual dawn a nih chuan lungawilohna a lo chhuak leh ang tih kha ka ring a. Chuvang chuan a bik takin

demand area te an khawngaih thlak in ka hria. 1986-ah MNF leh India sorkar te inremna kan nei a. Chumi atanga rei lo te ah an bei leh bawk si a. Anni lam tan chuan zalenna hun hi a tlem em em mai a, hetianga thuthlung siam rem a lo ni ta hi a lawmawm em em a ni. Keipawh tawn hriat deuh roh ka nei a, kum rei tawh deuh ah khan Tuirial kam ah ka thiante nen zankhat leh nikhat min han mikhual chu min man chu a ni chiah si lova, kal an phal bawk silova , a thawpik thlak ang reng khawp mai. Khangte kha min ngaihtuah chhuah tir a. Khami tuma mikhual nih kha chu thil nuam tak chu a ni lo. Vawiinah chuan zalen takin khulai lui dungah te pawh kan han kal thei tur te pawh a hlimawmin ka hria a.

Tin, hei Remna Ni a lo hnai a, kan hnam sipai ten Mizoram tana an lo beih na zalenna an lo sualna te min ngaihtuah tir a. Kan unaute pawhin an hnam tana an beihna chu a hma aia dinhmun tha zawkah an inhlangkai tih te min ngaihtuah tir a. Heng hnam tana bei tute hi an va hlu em tih te ka rilru ah a lo lang thar a, an ngaihsan awm hle in ka hria. Chulai kara Pu Speaker, kan hnam sipai rammu, ram tana zalenna suala theihpatawpa bei tute i dinglama thu te pawh an awm ang, anni pawhin vawiina sawi nuam an tih ber chu an vanglaia he ram tana ke an lo penna chu a ni. An tu leh fa te hnenah pawh sawi chhawn an chak ber zel a ni. Amaherawhchu chutih lai kara zalenna an sual lo ti a anmahni damchhung huna an thil tih hlu berte a lem ang maia an chhuahsak te hi kan in ngaihtuah thain ka hria. He zalenna an sual hi thang leh thar te hnenah Zofaten kan hlanchhawng ve zel tur a ni dawn lawm ni tih hi he House kaltlang hian Zoram mipui te hnenah ka sawi ve duh a ni.

A tawpa kn sawi duh chu Dan kan lekhawhna chungchangah hian a nihna ang tak hian lekhawh ila a thain ka hria a. NLUP chungchangah te pawh hian hei lekhka kan dawng ringawt mai a, NLUP guideline fel tak te kan han siam a, chutih lai karah chuan, kan pehhel thui deuh nge ni, i bialah, hei, NLUP chutiang khatiangin kan han ti a, West-I ah te pawh hian, a bialtupa chu Pu Sangthuama ni a ka hriat lai khan, a lo tling ta lo zawka te kha lekhka kan han pe a. Hengte pawh hi guideline palzutna a ni a. Chuvang chuan Dan kan siam ta rau rau a nih chuan kan zawm ngam tur hi kan phuah chhuah thain ka hria a. Vawiina he Sinlung Hills Council Bill pawh hi dan tha tak a ni, dan anga kan pass a nih chuan kan hman ngam a thain ka hria, chu chu ka sawi duhin he Council Bill hi lawmawm ka tiin ka thlawp a ni tih ka sawi duh a ni e. Ka lawm e.

SPEAKER : Midang tunge sawi leh ang? Sawi tur kan awm tawh loh chuan House Leader kan sawm tawh mai dawn asin. Pu Thanliana i lo ko ang.

Pu LALTHANLIANA : Pu Speaker, hun min pe a ka lawm e. Sawi ve loh theih loh niin ka hria. Kan ngaihthlak tawh ang khan a buaithlak ziate va hre ve vuai vuai zingah kan telve avangin ambush zingah khan ka tel ve a, inremna tulzia leh pawimawhzia hre zingah khan telvein ka inhria a. Hetianga kan sorkarin remruatna tha tak mai a siam a, inremna thuthlung a siam hi lawmawm ka ti a. He Bill hi pass ngei ni se tih ka sawi duh a. Chutih rual chuan a area vel chungchang kha keipawh ka lo chhinchhiah deuh a.

Pu Speaker, ka lawm e. Committee-a quorum chungchang hi two third of the member excluding the Chairman tih a ni a, 15 ni ta se, 10 an awm loh chuan rorel thei lo tur ang kha a ni a. Helai hi a size hi lian lutuk em aw, ka ti deuh a. A zat tur chu ka hre chuang lo nain hei aia tlem deuh hlek hi ni thei se chu Committee lo-a thulh mai te a awm palh kha a awm thei ang tih kha ka hlau deuh a, helai hian ka rilru a la deuh hlek a. A thalo phei chu ka ti lo a, amaherawhchu, a huphurhawm deuh em aw te ka ti a, ka lo chhinchhiah zingah a tel a.

Tin, qualification of membership of General Council tiha vote nei thei, registered as voter in any of the electoral rolls as defined in sub section-I of section 32 of this Act tiha vote an neih tawh chuan thlan theih ni turah ka ngai a. Kum 18 hi chu an naupang deuh em aw ka ti a. MLA hi kum 25 vel a lo ni a, kha kha kan ngaihtuah chiang turah chuan ka ngai a. Helai hi a ngaimawhawm em ka hre lova, amaherawhchu, kan duh naupang angreng khawp mai a, kum 18 china vote pe theitu tur chu. Engpawhnise, kohhranah te pawh hian kum mipa 18 leh mipa kum 21 tih a ni a nupui pasal innei thei, chutah chuan kum 18 kha member an nih chuan an va naupang awm ve ka ti deuh a, chungte chu ka sawi duh a.

Pakhat lehah chuan he autonomy hi within the state of Mizoram with autonomy to some extent under the state government tih a ni a, a update deuh em aw ka ti a, a chiang lo nge in tihdan than ka hre lo a. To some extent han tih ringawt hi a chiangkuang em aw tihte ka ngaihtuah a. Khangte kha ka ngaimawh zawng tam tak zinga tlemte ka rawn sawilan a ni a.

Pu Speaker, ka sawi duh ber chu inrem hi a pawimawh ka ti a. Mizoram sorkar leh HPCD te hi a tir atangin ka lo ngaihven ve khawp mai a. Thutlukna tha

tak ni tura ka ngaih a han thleng a, hetiang bill kan han ngaihtuah thei tur hi a lawmawm ka ti a, karawn support a ni. Ka lawm e.

S P E A K E R : Pu T.Sangkunga i lo ko ang.

Pu T.SANGKUNGA : Pu Speaker, tawite ka sawi ve duh chu he inremna hi ropui ka ti a. India ram state ralmuang ber kan tih thinah a nemnghehna tur tlema ralmuang lo lai inrem lehna hi a ropui ka ti a, lawmawm ka ti takzet a, kan sorkar leh HPCD lam pawh fakawm ve vein ka hria a. Home Minister zahawm tak sawi ang khan gift and take a ni a. An nin sixth scheduled hnuai a dah an han demand a, kan sorkarin heng em em chu an ti a. Chutih laiin CEM neih an demand te kha rem an han ti veleh thung a, khatianga gift and take policy hmanga an han ti thei kha he ram hi ram nuam a nih theihna tur kawng a ni a, lehlam lehlamin fakawm ka ti a, lawmawm ka ti a.

Amaherawhchu, nichina an sawi ang deuh khan keipawn ka lo chhinchhiah ve chu Sinlung Hills Development Council Constitution and Conduct of Business Rules, 2008-ah khan thlan theih chin kha kum 25 tih a ni a (a hluiah khan). Kum 18-a a tlahniam ta daih mai leh electoral roll a chuang, council area pawna awm ten chuh theih niin a lang nghal a. Thil awm thei chu entirnan – Roll hi a tlangpuiin January thla hi kan hman hun a lo ni a. Entirnan, November-ah inthlang ta sela roll-a la awm lo kha a date of birth-ah kum 18 a nih chuan thlan theih a ni dawnin a lang a. Council member atan chuan naupang deuh mang e aw tih member zahawm tak takten an han sawi kha keipawhin ka lo chhinchhiah lai a ni a. Voter pawh la nilo te thlan theih dan a awm chuan CEM pawh a ni thei dawn tihna a ni a (thlan a nih kha chuan). Khawvelah hian hruaitu ber hi chu tlema naupang han tih pawh hi kum 30 chuang an ni deuh nual a. Heta kum 18 tling lo pawh CEM a nih theih dante kha ka hresual nge, nakinah kan puten min la hrilhfiah turah ngai ila. Hetiang a nih chuan voter ni pha lo te CEM nih theih dan arawn inhawng te hi chu Rule hmasa Sinlung Development Council a nih laia kum 25 kha hmang zawk ta ila chuan i dinglam ami leh i veilam amiten an han sawi ang chi a kha ka lo chhinchhiah ve zingah pawimawh ka tih avangin karawn sawi nawn ve duh hrim hrim a.

Tin, ka zir chian hmaa min strike deuh ni a ka hriat chu Act-ah hian repeal and saving a awm lova, Development Council a nih lai kum 2008-a an siam kha dan a ni ve in ka hre si a, saving chauh hi Rule tharah hian a awm si a ka ti a. Mahse, kan hotute Assembly amite ka han zawt chiang a. A hmasaa kan siam kha Act a lo ni lo va an ti a, Act pass lovin Rule chauh neiin Sinlung Development Council kha kan lo

run a nih kha chuan repeal tur chu a awm lo ngei mai a. Amaherawhchu, a Rule hmanga siam a nih avangin Rule siam hnuah chuan Rule hmasa kha kan repeal loh chuan Rule 2 a awm dawn a ni a. Hei hi chu kan hotuten an hre em emin ka ring a, he House-ah hian ka rawn sawi ve duh hrim hrim chu Rule dinglai Sinlung Hills Development Council/Constitution and Conducts of Business of Rules, 2008 a lo awm tawh a. Vawiina kan Act hi kan pass hunah Rule siam leh hunah khan repeal ngei ngei loh chuan Development Council Rule kha a lo la din bawk chuan Rule 2 kan nei dawn tihna a ni a. Fimkhur a ngaih thu hlaah han din takah chuan ka sawi duh mai mai a. Act leh Rule tam berah hian repeal and saving provision hi a awm thin a, tun ami 61-a saving chauh a nih tak hian min strike deuh na hi an ti dik thlap a ni. A hmaa mi kha Act a lo nih loh miao avangin repeal tur chu a awm lo ngei a, Rule siam hunah erawh chuan helai hi fimkhur a ngai turah ka ngai.

Tin, an rawn sawilan tak ka sawi leh duh chu pawnlam atanga chuh theih tur anga lang hi a thatna leh that lohna nizan pawh khan ka ngaihtuah nasa mai a. Council puitlinga councilor tur leh executive member ni tur chuan Siaha pa pawhin an chuh thei turte kha an changkan phah zawk ang em tih leh pawnlam atanga chuh awih a kha a dan kalhmang lo deuh em tih kha ka hma amite ang deuh bawk khan, han chhiar thuak kan ni a, ka hmu kim lo te pawh a ni mai thei a. Khalaiah khan khawi atang pawhin Lawngtlai lam atang pawhin a chuh theih daih dawn a nih hi tih tur kha a ni a. Chuvangin khalai kha chu chi hnih awm theiin ka hria a. Mi fel tak tak khilai area ami voter pawh nilo, in leh lo pawh nei lote, pa fel pui puiin an chuh theihna Dan a ni dawn a, a tha phian mai thei a, council kha a changkan phah viau mai thei a. Amaherawhchu, khita a chhunga mi, council area chhunga mi voter ngei han tih kha chu a dan kalhmang deuh em, mi tihdan kalhmang deuh lo nise tihte ngun takin ka ngaihtuah ve mai mai a. Khalai kha a siam dawn ah thil chi hrang hrang en hian uluk deuh taka helai bik hi chu siam a la ngai awm mang e tiin ka lo ngaihtuah a.

A tlangpui chuan, hetiang hun chep tak karah kumin April-a inremna ziah, tuna Dan puitling kan han nei mai tur leh MNF leh India sorkar Remna Ni hma chiah a, khami Remna Ni-a lo awm tawh dang han sawi theih tura a awm leh hetiang a Dan chak tak an han siam hi chu a Department te ber atanga lian ber thlengin fakawm ka ti a, he ram tan hian tha bawkin ka hria a. Remna tha tak kan han nei tur hi lawmawm ka tiin, he kan Dan ruahman hi pass ngei turin ka support a ni e. Ka lawm e.

SPEAKER : Pu Rinthanga'n sawi rawh se.

PU K. LALRINTHANGA : Pu Speaker, ka lawm e. Vawiina kan bill sawiho tur ah hian sawi ve ngei tulin ka hria a. A chhan chu Serlui bial khaw thenkhatte Village Council Area chhungah hian kan tel ve a. Sorkar-in Development chi hrang hrang a khawih tur ah te, administration a kalpuinaah te harsatna awm thin hre chiantute kan nih ve avangin vawiin hi a lawmawm em em a. Chuvang chuan han sawi ve ngei tulin ka hria a, ka rawn ding chhuak a ni.

A hmasa bera ka sawi duh chu tun Mizoram state sorkar -ah hian remna leh muanna duhtu Chief Minister te, Home Minister te kan nei hi lawmawm ka ti a ni. Mizoram kum engemawzat 1966 atangin kan buai a, 1986-ah remna leh muanna a thleng a ni a. Khami hun chung khan kan hriat theuh chu political party zawng zawngte hian inthlan dawn apiangin manifesto ah remna leh muanna hi No. 1-ah kan dah vek thin a ni ka hriat chin ah chuan. Amaherawhchu, tuna kan Chief Minister hi 1984 ah thlan tlin a ni a, Chief Minister a rawn nih hma kha chuan remna leh muanna a awm thei lo. A chhan chu underground te hnenah Mizoram sorkar-a thuneihna pe phal an awm ve loh avangin remna leh muanna a awm thei lo a ni tih hi a tawi zawngin sawi ta ila.

A ni hi Chief Minister a rawn nih a, 'Chief Minister ka nihna ka kian thei ang,' tih a rawn sawi atang chiahin remna leh muanna kawng kha zawh in, inbiakna kawng pawh a awm thei a. Chutiang chuan Mizoram ah remna leh muanna kan nei thei ta kha a ni a, lawmawm ka ti tak zet zet a. Anin a seat a ken rualin Minister dang te pawhin thawhhona tha tak hnuaiyah an seat an kian thei a, chutiang chuan inpekna thui tak nen remna leh muanna kan han nei kha lawmawm ka ti a ni.

Remna leh muanna duh tu Chief Minister kan nei a. Political party dangin Mizoram-ah sorkarna an lak reng reng in remna leh muanna hi kan la nei ngai lo. Remna leh muanna kan neih tawh chhun te chu 1986-a kan neih te, tuna kan Home Minister zahawm takin a a sawi 1994-a inbiaknaa inremna kan neih te, kumina inremna kan neih te hi Mizoram-a remna leh muanna, Mizoram sorkar leh midang ten an sign awmchhun te chu a ni a. Chuvangin ka sawi duh chu hruaitu remna leh muanna duh kan nei hi lawmawm ka ti a. Chuvang chuan lawmthu ka sawi duh a ni. Kum 2008-ah

MLA kan inthlang a, chutatang chuan kan hming te pawh a lo lang ve a, Sinlung Council Area chhunga MLA 3 te chuan kan area chhunga harsatna awm te chiang takin kan hria a ni. Heng lo awm chhan hi bial chhunga mi thahnemngai ten development nasa zawk duh vanga hma an lak a, chutia duhthawhna avanga harsatna lo thleng a ni tih kan hre theuh a ni.

Chutih rual rual chuan, duhthawhna avanga harsatnaa lo thlen avang chuan development erawh thung hi chu a kal hleithei lo a ni. A chhan leh vang chu sorkar-in development hnathawh a han tum thin a, chutia hna thawh a tum chuan agency-ah contractor te emaw, tu tu te emaw, tin, sorkar hnathawk te emaw a rawih loh theih lova, chungte chuan an hnathawhna kawngah harsatna an tawk a. Rambuai a nih chuan hna an thawk tha hlei thei lova. Chu chuan area chhungah development kal tur te a ti sukukin harsatna kan thleng thin a. Kan V/C te leh mipuite pawhin hetiangam ram buaia awm hi hrehawm an ti em em thin a ni.

Amaherawhchu, chutih rual rual chuan, tun dinhmun ah chuan remna leh muanna sign a lo ni a, Council area chhunga kan underground te pawh an rawn chhuak thei hi lawmawm ka ti a. Hemi atana hma la tu hi mi tam tak kan awm a ni, lawmawm ka ti. Mi tam takin Pathian hnenah remna leh muanna a awm theihna turin an tawngtai a. Thenkhatin thu leh hla in hma an la a, sorkar-in ngaihtuahna a siam a, remna leh muanna a awm theihna tura ngaihtuahna sengtu zawng zawngte leh hnathawktu zawng zawngte hnenah hian lawmthu sawi loh theih loh niin ka hria a. Area chhung MLA te kan nih ve avangin ka lawm tak zet zet a ni tih ka sawi duh a.

Hei bill pass tur Sinlung Hills Area Council bill pass tur, tun hun ah hian kan Home Minister zahawm takin a rawn buatsaih thei hi, a rawn buatsaih fel ta hi lawmawm ka ti a. A chhung bill chungchangah hi chuan sawi vak pawh tulin ka hre hnan lem lova, saptawng thiam zawk te leh saptawnga a kawh dan hretu zawk, hre deuhhlekk tu zawk, hrechiantu te an awm ang a, sawi vak pawh tha ka ti hnan lem lova. Amaherawhchu, hetiangam inawpna tur tha zawk ngaihtuah a, hun rei lo te kara hmanhmawh taka bill sawiho tur leh pass tura ruahmanna an han siam hi tha in ka hria a. Chutih rual rual chuan, ka hmaa sawitu chiah khan Council area pawn atanga chuh thei rawn awm thei tur, khami thalo a tih lai kha, kawng leh lam ah chuan kei chuan a tha viau mai awm mang e aw ka ti a. A chhan chu Aizawl

tlang atangte leh hmun hrang hrang atang hian Council area atanga rawn seilian a, he area chung tana mi thahnemngai tak tak hi an awm fur a ni. Chungte chuan Council area chhunga development nasa zawka a kal theihna tur hian ngaihtuahna tam tak an hmang ve a ni tih hi chiang takin ka hria. Chutiang anga a area chung tana thahnemngaihna neia va in candidate an nih loh chuan hmun hrang hrang atang chuan an tling lo tawp ang tih chu chiang sa a ni a. Thahnemngaihna nei nia an hriat te Council area chhunga mipuite'n vote theih tura an rawn in tarlan ve theih kha a tha ve riauin ka hria a. Chuvang chuan, tun dinhmun hi bul tanna a ni a, nakin ah Council te pawh din a la ni ang a, anmahni ro in rel te pawh a lo ni chho ang a, chung hun ah chuan tha lo an tih chuan an la paih ve thei mai turah ngai ta ila. Tun dinhmunah chuan he Council din theihna tur hian hnathawktu leh thahnemngai a thu leh hla a lo in fahtu midang tam tak hi an awm ve avang hian an tel ve te pawh hi a tha a ni lawm ni tiin ngaihtuahna ka siam a. An tel ngei hi thain ka hria tih ka sawi duh a ni. Chutichuan he bill hi he House hian lungrual takin pass ila ka duh a. A thalo lai te a awm a nih chuan nakinah la siamthat leh theih tho a ni a. Tun hunah hian member zawng zawngin lungrual takin pass ni se tih ka duh thu ka rawn tarlang ve a ni e. Ka lawm e.

S P E A K E R : Dr. Ngurdingliana.

Dr. NGURDINGLIANA : Pu Speaker, ka lawm e. Member zahawm tak Serlui bialtuin a sawi ang khan ka bial chhung khaw 24-ah khaw 9 hi demand area chhunga awm kan ni a. A tuartu kan ni a, he remna leh muanna, sorkar leh kan HPC(D) unau ten an han sign thei ta mai hi a lawmawm dan chu han sawifiah chi pawh a ni lo a. Bialtu nihna piah lamah khaw mipui, a tlangdung mipui kan lawm em em a ni tih kha a hmasa in kan sawi duh a.

Khawi hmunah pawh Development Council movement lo piang reng reng hi khawvelah hmasawna kawnga duhthawhna vang thil a ni a. Tin, sorkar inrelbawl dan a inanglo a, India ram chu democracy, mipui zalenna ram a ni a. Ram hrang hrangah dictatorship hnuaiah te, inthlauh thlakna/economic depravation te, ethnic depravation te a hrang hrang a awm thei. India ramah chuan zalen takin movement chi hrang hrang hi democracy-in a ken tel avangin Chhattisgarh-ah a ni emaw, Uttarakhand-ah a ni emaw, Maoist movement kan tih te, Naxalite movement kan tih te pawh tam tak a awm tih kan hre vek a. Vawiinah kan ram bikah 1986 atanga kan House Leader leh kan Chief Minister kaihhruaina hnuaiah leh Pu Laldenga, kan

MNF hruaitu zahawm tak vawiina fam ta te nen nichina kan ngaihthlak give and take thinlung putna atanga remna leh muanna zau zawk a Mizoramin kan neihna kal chho zelah, heng kan unau hnam bila awm te hmasawn duhna kal chho zelah kan hotuten hetia thiam taka an han ti hi a lawmawm ka ti a. Keini Mizo hnahtlak hi hnam peng hrang hrang awm mah ila, a tawpkhawkah chuan kan lungrua a. State nih hma UT kan nih khan Autonomous District Council pathum a rawn piang thawt a. Chungte pawh a hunin a hril tel a ni tiin pawm takin kan hotute an kal chho a. State kan nih hnuah tun hi a vawikhat nan inremna thuthlung lo awm leh hi niin ka hria a. Hetiang zawnga kan hotuten huapzo taka ngaihtuahna senga hma an la hi lawmawm ka ti leh zual a ni. Kha kha a tawi zawngin ni se. Nichina move-tu, Home Minister zahawm takin a sawi ang khan hemi kawnga hma latu tam tak, HPC(D) unau te piah lamah kohhran ang zawng te, sorkar aiawh te, khang zawng zawng tha thawh, ngaihtuahna seng zawng zawng te hnenah khan lawmthu kan sawi a. Tichuan hemi Council Bill in a rawn ken tel kum 18 tih te leh pawn lam atanga khilai voters area chhung ami lo tan chuan chuh theih loh ni se tih leh ex-officio chungchang kha sawifiah lawk ka duh a.

Indian Constitution hi Pu Speaker, khawvel constitution-ah chuan a fun kim ber, chipchiar ber, exhaustive constitution ti a an sawi a ni a. A kim em em mai a, mihang, midum, mingo, mieng, sakhaw hrang hrang kan awmna ram a ni a. Khang zawng zawng funkhawm khan mumal tak maiin kan constitution draft tuten inrelbawl dan, Union List te, State List, Concurrent List an siam bakah hnam hnuaihning zawk, ei leh bar/economics-a lo thang zel te, tribal area te humhalhna tur provision tam tak an dah chho hi kan han hria a, President, Vice President, Governor ni tur chuan kum 35 chung lam nih a ngai a. Lok Sabha inthlannaah member chuh thei tur chuan kum 25, Rajya Sabha-ah kum 30 chunglam, MLA-ah kum 25. MLC kan tih hi state nazawngin kan nei lo a, khung Karnataka te, Maharashtra te, state 6 laiah a awmin ka hria a, Member Legislative Council tih a ni a, hei pawh hi kum 30 a ni a.

Tin, Constitution hnuaiia articles awm zawng zawng tuna ka sawi bakah Municipality kan tihah hian kum 21 chunglam a ni a. Tin, Panchayat kan tih keiniah chuan a hming a dang a ni mai a, Village Council kan tih, mahse tier hrang hrang Panchayat kan tihah hian kum 21 a lo ni ta a. Chungah chuan keini 6th Schedule hnuaiia inrelbawl na zau tak kan neihah hian Local Council hi kum 18 an ti a, tun hnuah Municipal Aizawl a lo pian hnu khan. Village Council hi kum 18 chin in an chuh thei a, vote an neih hnuah. Amaherawhchu kan hria a, a practical tak tak chuan

kum 18 awrha Local Council member nih emaw, V/C ni emaw hi kan tlem viau ang. Hemi a article piah lama helai kan State huangchhunga kan inrelbawlnaah chuan kei chu kum 18 hi tha ka ti khawp mai. Local Self Governance, India Constitution pawhin a duh em em, a hnuaihnhung ber democracy-a a siam Panchayat ang te keiniah chuan Village Council te, thuneihna insem zaina kawng a nih avang hian kei chuan ka lo thlawp khawp mai a.

Tin, Chhinlung Hills Council area chhung ami chauhin chuh theih ni se tih hian a tum hi a kawk zawk lo maw tihah kha chuan, India ram chhung zawngah hian khawi state-ah mah, khawi Council-ah mah chumi chuan a chuh thei lovang tih hi ziak in a awm lo a. Chung a awmna Constitution dang han bih chuan entirnan hnam ral mai tur Australia ramah aborigine kan tih ang te, hung bik, eng emaw chhan vanga special tak an nih loh chuan, khatiang kha bar theih a ni lo va. Chuvangin tunah pawh kan hria a, Pi Indira Gandhi pawh kha khutah Karnataka-ah Chitamanga lore-ah te pawh a zuk contest thei a. Rajya Sabha-ah pawh Manmohan Singh pawhin Assam aiawh a thei a. Khatiang khan democracy hnuaiyah chuan exceptional case a nih loh chuan khatiang kha chu an dah ngaiin ka hre lo a. Chuvangin an rawn draft dan ang hian kei tha khat viauin ka hria a.

Tin, hemi piah lamah Tuivawl bialtu, member zahawm takin nominated member 3 tal ni thei se a tih kha chu ka thlawp khawp mai a, member zahawm tak Pu K. Lalrinthanga bial Serlui te, Tuivawl te, Chalfilh aiawh khan nominated member kha pakhat theuh ni thei se, amaherawhchu rawtna lo kal leh ex-officio ni a, MLA te han tih kher kha chu a body, a structure han enin sorkar inrelbawl dan han enin helaiah sorkar Joint Secretary level aiawh executive officer a awm dawn tho a, kha kha chu a tul lem em ni aw tih ka rawn rawt a. A tawpna ah chuan Pu Speaker, he Bill, “ The Sinlung Hills Council Bill, 2018” hi lungrual taka kan pass theih nan member te nangmah kaltlangin ka rawn sawm a ni e. Ka lawm e.

SPEAKER : Helam hi i pe hmasa ang, an khat deuh a, Pu Sangthuama.

Pu K.SANGTHUAMA : A sawi hmasa duh a nih pawhin ka kian thei tho a, Pu Speaker ka lawm e. Vawiinah hian thu seipui sawi tehchiam na hun pawh a awmin ka hre lo a. A hmasa berah chuan kan Bill-ah hian a area chin dah hi fel loin kan hre deuh nge ni, nakinah sorkarin a area tur hi ruahmanna a siam dawn nge ni, hei hi nakinah hrilhfiyah ni ta se. A area chungchang ah hian ni e, buai a awl khawp a, tunah pawh in han siam dawn ang a, a leh lamin an duh ang a, a lehlamin an duhlo ang a, harsatna chu kan la tawk tho chuan ka ring a, duh duha beng luih hi a har

angreng khawp mai a. Chuvangin area tur han siam mai pawh kha a har a nih te ka ring a. Hetilai hi tel se a thenin an ti ang a, a thenin kan duhlo emaw an ti ang a, mipui hi kan ngamloh ber an ni bawk si a, Pu Speaker. Chuvangin hei hi in harsatna, kan harsatna te pawh a nih ka ring a, theih chu ni se tunah hian pass thlap ila a tha ber mai a, chu chu kan siam rih si lo a, hunin a rawn hril tur ni maiah ngai ila, Dan te an han siam zawh ah.

Tin, Secretary term kum 3, hei hi Secretary hrim hrim a hi, Joint Secretary rank chin a awm ang tih kha a ni a, a dik thlapin ka hria a, Secretary hi anmahni kan Autonomous District Council pawh hian kan tawng an huat thu suh ah tha ka la tih ber chu administration-ah hi chuan MCS te, IAS te hi dah thei ila, District Council-ah pawh hian tha ber maiin ka hria a. Administration hi a har ber mai a, chuvangin keimahni leh keimahni kan indah khan politics-ah chuan duhsak zawngte a lo awm thin a, duhthusam lo ang reng tlat thin. Chuvangin hetah hian chuan tha ka ti khawp mai a, hun kal zel turah pawh la ni zel turah ngai ta ila.

Tin, a hun bi kum thum tih hi extend theih a ni a, extend turah hian duh chen chen extend mai tur nge, hei chu a zalen lu deuh lo maw? Kum khat te, kum hnih te tih theih a ni ang tih te awm sela chuan a tha ber chuan ka hria a. Tin, pakhat lehah chuan tax collection chungchang pawh hi fimkhur a ngai viauin ka ring a, nakinah movable properties tih te, immovable properties tih te, nuai khat chinah tih te a awm a, hetiang hrim hrim ah hian nakin kal zel ah tax ah hian buaina a awm duh khawp mai a. Chuvangin inhmun lo ram pawh engtin nge anmahni in an pe dawn? District Council-ah hi chuan midangin inhmun lo ram pawh kan nei hleihthei lo a, tunhma chuan Saiha-a kan awm ve lai chuan inhmun ka nei ve a, mahse ka hralh ta daih a. Tun hnuah hi chuan District Council Autonomous-ah hi chuan tuman an pe duh ta lo a, mahni ram hi kan ti zim zel dawn niin a lang a. Khalai pawh kha ngun taka kan sorkar-in in en a ngai ang tih ka ring a. A area zawng zawng ah hian anmahni Dan siamte kha kan sorkar-in approve te a la ngai ang a, chungah chuan khawchhakah, khawthlangah an ti ang a, Aizawl deuh chauh hi kan la chang thei mai thei a, chu chu khawvel kalphung thui tak a ni a. Chuvangin Pu Speaker, heng ah hian sorkar in nakin ah ngun takin (tu pawh lo sorkar se) ngaihtuahna kan sen thui viau chu a ngaih ka ring a ni.

Tin, kum chungchangah hian Pu Speaker, kum 18 em em hi chu rorel tlak chu kan la ni, lemlo a ni a dik chiah chuan! Kum 18 chu naupang BA pawh la pass lo a ni a. Pawl 12 pass vel an la ni mai a, tlema a kal chak deuh chuan leh kum 18-ah

chuan graduate te pawh an ni chho ve tawh a, (tunlaih chuan) mahse heti em em lutuk hi chu khiti laiah pawh an duh chiah chuan ka ringlo. Chuvangin kum 21 chin hi chu ni hram se chuan India ram pawhin ni thei tura a ngaih hi chu a dik khawpin ka la hre fo a, keichuan kum 18 hi chu tlem chuan a la naupang deuh ka ti a. Tin, pakhat lehah chuan Pu Speaker, a thatna leh that lohna a awm a, duh duha chuh theih a nih chuan han chuh huai huai ila, han inseng deuh ila kan tling ve thei mai thei a, entir nan a nia ka tih. Chutiang chu thil awm thei a ni a, mahse a area tan chuan a hnawk ve viau mai thei a. District Council-ah pawh chuan va chuh thei ta ila chuan kan tling ve khiah mai thei a ni, District Council pathum kan neih ah sawn. Mahse anni pawhin a area chhunga pianglo chu chuh theih loh tih dan kha an lo siam ve thlap a, anni chu an felfai mai a, helam atangin va ti ngawt dawn ila a tih theih ngawt lo a, chuvangin khami kha a that leh that lohna Pu Speaker, in ngaihtuah ngun chu a ngai khawp mai. Hei hi a tha zawk ang, tha lo zawk ang tih phei chu ka sawi thei chiah lo a, mahse anmahni area mi chu an hlim zawk chuan rinna ka nei a. Parliament te, MLA te nen chuan a tehkhin theih chiah chuan ka ringlo a, state chhunga inrelbawl na hrang kha a ni a, Parliament-ah te, MLA-ah te chuan a dik chiah mai a, duh duh kha a chuh theih a, duh duh chuh theihnaah khan kan va chuh lem chuang lo a. Heti laiah pawh he dan hi awm ringawt mahse, mi tam tak chu an inrawlh phei chu ka ring em em chuang lo va. Mahse, mihringin zalenna kan neihah khan sawisel tawk chu kan han pass chiah ang a, sawisel tawk, pu te hnena lo kal tawk chu reiloteah khan an tam leh thovin ka ring a.

Chuvangin helai Dan pawh hi a area chhunga awm ten an chuh thei ang tih chu ni se, a area chhung ami chu an hlim zawk mai thei a ni tih kha han sawi ve leh ka duh a. Vawiina kan Dan hrim hrimah hian, a la amend zel theih a, nakinah pawh sorkarin a enpui zel tur kha a ni mai a, vawikhatnaa Dan siam hi a felfai thah thei bik lo va, engemaw neuh neuh chu sawisel hrim hrim ang aw tih chuan sawisel tur phei chu tam tak ka hre tho va, a tul berin ka hre lo va. An inrelbawl na chungchang, budget chungchang te, sum chungchang te, helaia a ziahah chuan a clear cut em em lutuk chuang lo va. Anmahnin session te an nei ang a, committee te an nei ang a, thla 3 danah an nei zel ang tih te, anmahniin budget te an rawn ti ve ang a, kha kha sorkarin a enpui ang a, an passed ang a, an pe dawn tihna maiah ka ngai a, chu chu an kalphung tur niawm tak a ni. A tlangpuiin kan Autonomous District Council Dan tam tak entawna siam niawm tak niin ka hria a, chuvangin autonomous an ni chiah lo va, mahse dah len ve an duh a, dah len ve kan duh siah chuan kha bak chu amendment siam tur chu Pu Speaker a awm bawk si lo va, khalam hawi deuha kal

kha kan duh ni maw ka ti mai a. CEM te an awm ang a, executive member te an awm ang a, khatiang kha a ni chho ta vek a, an thuneihna erawh kha chu a inchen ta lo deuh tihna a ni mai a. Nakinah chuan an la tum tur chu Autonomous District Council a ni mai a. Central sorkar leh Mizoram sorkar-in rem a tih chuan pek pawh kan la pe mai thei a.

Thuneihna hi mitinin kan duh vek a, keini pawhin independent kan sual a dik chiah chuan. Thenkhatin in sual lo te an ti a, independent chu kan sual a. Hei hi kan House Leader pawh hian khati lam khan khawngaihin ti ti tawh lo se tih tunah pawh ka ngen duh a. Mihring reng reng hian ngaihtuahna thinlung hi kan nei theuh a, tunah pawh HPC hian Autonomous District Council an dil a, chu chiah chu kan pe thei ta lo rih a, Central sorkar te a ngai a, kha kha chu an dil a ni, an dil kha sorkarin a ti thei rih lo a ni mai a, rilru taka pawmpui pawh an ngai a. Chutiang deuh hlek chuan thiltihah hian mihring rilru mak deuhna ang thinlung hi a tha hrim hrim lo hian ka hre ve a, nakinah te phei chuan an la nei lo ang tih theih pawh a ni chuang lo HPC-ah te pawh hian. Hun a lo kal zel ang a, keini phei chu he House-ah hian kan thut loh hun a la awm ang. Kum hrim hrimah pawh thangthar an lo la kal zel ang a, tha zawk tur chu Pu Speaker, an la ngaihtuah chho zel ang a, chu chu khawvel kalphung hrim hrim a ni a, hemi kawngah hi chuan rilru zau tak, ngaihtuahna zau tak, kan state pumpuia keimahnin rual khaia ka siam a ngai a, chu chu kan sawi duh a.

Engpawhnise, remna leh muanna a awm a Pu Speaker, a lawmawm a. Remna leh muanna hnuaiyah lo hi chuan thil tih a har a. Kan Chief Minister te pawh an fak awm em em a, remna leh muanna chungchangah te pawh. Tin, 1986 inremna hma khan Mizoram pumpui kha dik chiah chuan remna duhin kan tap a ni a, a dawn tep April thla chho velah kha chuan chaw ngheiin zirlai ho zawng zawng leh kohhran ho zawng zawng leh YMA thlengin kan rum tak meuh a ni a. Remna leh muanna a awm a, vawiinah chuan mumal takin Mizoram kan kal chho thei a, a lawmawm em em a. Chutih lai karah tuna HPC D atang hian 1990 velah harsatna a lo kal chho leh a, vawiina kan han solve leh thei hi a lawmawm em em a, a dang hi a lo la kal leh zel dawn em kan hre lo va, kal leh zel tur te pawh a la awm thei ang kan hre lo va. Mihring chuan mahni tana tha ber tura kan ngaih hi champion pui kan tum thin a ni a. HPC kher lo pawh hmun dang dangah te pawh hian council leh council te pawh hian development hi an rawn la ngen zel a ni mai thei a. Kan hriatreng atana tha ka tih chu thil hi awlsam lutuka ngaihtuahna kan hman hian kan ram tan a tha ber em aw, a tha ber lo em aw tih ngaihtuahna kan siam fo a ngai a.

Pu Speaker, tawite, vawiin bak hi thusawina hun kan zavai hian rualkhaiin tun term-ah hian kan nei leh dawn tawh lo va. District te pawh hi keichu entirnan, Lunglei District te pawh saw, Chakma kan tih fo Bangladesh atanga foreigner tam tak lo kal te pawh hi kan control theihna tur chuan sawlai area hrim hrimah sawn district te hi DC administration tha tak ti thei tur te hi dah ila, sawlai area-a kan dah phawt chuan administration hi dik chiah chuan a pawimawh em em a, khatiangah khan kan rilru te hi rualkhai takin awm se.

Tichuan, Bangladesh atanga kan ram mi ni lemlo lo kal te kha Pu Speaker, a dan te hi a awl zawk awm mang e tih ngaihtuahna ka nei a, chu chu kan hotute pawhin in rilru ngaihtuahnaah lo nei ve ta ula, vawiinah dah ang, a tha ang ka tihna pawh a ni chuang lo va, hun lo la kal zel tur atan chuan a ram mipui hian kan thatpui mai awm mang e ka ti a. Entirnan, Demagiri-ah emaw, a piah deuhah emaw IAS pachal in emaw awp thlap se chuan, engkim mai hi administrator titu ho kuta a awm chuan politician chuan hetiang hian kan han ti a, heti hian kan han kal ang, (SPEAKER : Hun i hmang tam tawh riau mai a) mi an nel si a, kan duap leh deuh mai zel a. Chuvang chuan khatiang ang chi khan district te hi awm se, vawiinah keini, keini tih lam kha ka sawi lo va, a ram pum chanchin kha ka rawn sawi zawk a ni a Pu Speaker, khatiang thleng khan ngaihtuahna zau tak hmang ila kan ram tan a that ka ring ve a ni. Awle, he kan bill hi Home Minister zahawm tak hian a buatsaih a, chuvangin vawiinah hian tha taka kan pass a ngai a, tha takin kan pass turah ka ngai a, ka rawn support a ni e.

Dr. B.D. CHAKMA : Pu Speaker, ka lawm e. Patent error section 7, sub section 2-ah resignation of member of General Council-ah hian ‘Provided that such registration a inziak a, printing mistake a ni mai thei, resignation tur a ni a. Such an effect only upon acceptance of the Chairman or Deputy Chairman as the case may be, registration tih kha resignation tihtur a ni a, Tin, section 42 sub section (b) Powers to make rules, regulation, election of members-ah hian The Appointment of Returning Officers, Presiding Officers and Ruling Officers a inziak a, hei hi Polling Officers tur a ni a.

Tin,Chakma CADC hnuaiyah EM leh CEM te kan lo ni tawh thin a chuvangin Secretary appoinment chungchangah tlem sawi tur ka nei a. Rules 16 section 16 sub section 5 – The terms of appointment of Secretary for a period of 3(three) years but may be extended by the Government in consultation with the Chief Minister tih a ni a.

Pu Deputy Speaker, Secretary appointment chungchanga 3 years appointment hi chu a term kha Executive Council kutah awm thei se tha ka ti. Achhan chu Secretary leh Executive Council hi mahni opinion a nih loh chuan a hrehawm lutuk thin a ni. Ka CEM nih lai pawhin opinion tihin a awm thei ta a ni. Kum thum chhung hetiang rules-a a awm chuan Executive Council nen opinion a inmil loh chuan a hrehawm lutuk ang. Rules siam lain DDO power hi a nei dawn tih a lang a, DDO power a neih chuan khatiang financial irregularities emaw, thil diklo emaw tih palh a awm chuan thlak theih dan hi a awm miah lovang. Kum thum chhung a awm chuan Executive Council nen an inmil loh chuan a buaithlak viau ang. Chuvangin, hei hi kum thum term hi mention lovin Joint Secretary rank atangin a senior berte hi Executive Council thuneihna angin sorkar hnenah recommendation hi an thehlut thei a ni. Chuvangin, hei hi chu term mention lovin Executive Council kutah awm thei se tha ka ti.

Tin, a tawp ber atan minimum age of Councillors kha 18 years in a ziak ta a, 18 years kha chu a naupang lutuk deuh lo maw ka ti a, hei hi chu autonomous body ni lovin thuneihna sang zawk nei a ni a, matric pass emaw PU pass emaw chauh a ni a, chuvangin a tlem berah 21 emaw, 25 years of age emaw ni se, tender age a ni a, elected body a nih chuan. Chuvangin minimum age-ah 21 emaw 25 years of age ni thei se a tha ka ti.

Tin, a tawp berna atan chuan he bill hi Mizoram mipuite tan remna leh muanna atan a that beiseiin ka support e. Pu Deputy Speaker, ka lawm e.

DEPUTY SPEAKER : Tu nge sawi leh dawn le? Kan duhtawk deuh em ni? Pu T.T.Zothansanga.

Pu T.T.ZOTHANSANGA : Pu Deputy Speaker, ka lawm e. Vawiinah kan sorkar chaktakin inremna a rawn chhawp chhuak leh thei hi a lawmawm ka ti khawp mai a, inremna chungchangah hian Congress party hi Mizoramah hian a symbol kan ni tan tawh a, kan ni mek zel bawk a, lawmawm ka ti a, remna duhtu chu an eng a thawl e tih ang khan kan sorkar hi a fakawm hle a ni tih ka han sawi hmasa duh a ni.

Pu Deputy Speaker, an sawi deuh teuh tawh a, tam tak ka rawn sawi lo ang a. Ka rawn sawi duh chu section 18-na 2-na ah khan General Council khan state sorkar atanga development lo kal reng reng kha thla thum danah endikna hna an thawk thei ang tih ang deuh khan a rawn inziak a, 'Summon a meeting at least once in every three months to monitor progress and implementation of the allotment of the work

executed by the department of the state government' a rawn ti a ni. Kha kha a tha khawp mai a, chutih ruala ka sawi duh chu Council vek hian in plan leh scheme chuang zawngin an formulate thei a, an execute thei a, an examine thei a, an review thei a, an monitor bawk dawn a ni. Khalaiah khan anmahni hnathawh an area huamchhunga thawh hrim hrim kha va check ve tu kha an awm dawn miah lo tihna ang a ni ta a. Tunlaiin kan hria a, DPR siamtute pawh hian an execute hi an phal tawh lo a ni. Anmahnin an execute a, an formulate a, an review a, an monitor bawk kha chuan an solo lutuk palh mai ang tih ka hlau a, State Govt. in tlema a lo va enpui theih lai kha a pawimawhin ka hria. Developmental work hi monitor lai tak hi a pawimawh lai ber a ni tel a, anmahnin an execute-a an monitor bawk kha chuan hna kha lo thuanawp ta sela harsatna kan nei nasa ang tih kha ka hlau a. Zep thu a awm lem lo, NEC te, NECPR te pawh kan han dawng thin a, a monitor lamah kan chaklo deuh pawh a ni mai thei tukin chanchinbu thlengte khan a la rawn ti chhuak a. Hei hi tun sorkar bik pawh a ni lova, tunhma atang tawhin a ni a. Chuvangin monitoring hi a pawimawh si a, state sorkar-in an an bial chhunga hna an thawh an lo monitor pui em em lai si a anmahni hnathawh monitor pui ve miah si lo lai kha a felloin ka hria a. Khalai kha ka rawn ngaih pawimawh lai a ni a. Kan council khi thang duang se, theihtawp chhuah se kan ti a, hmasawna ropui tak ni tur pawhin kan duh, amaherawhchu a monitor lamah khan kan puih tel a ngaiin ka hria a, kha kha ka sawi duh a.

Tin, Pu Deputy Speaker, vawiina kan Council Bill hi tha ka ti khawp mai a. Hei hi keichuan anni chauh lo pawh midang pawh hi nichina member zahawm tak Pu Sangthuama'n a rawn sawi ang khan hmun dangah te pawh a la awm thei, rualkhai deuh in a ti a. Hei hi uluk deuha kan en a ngai a ni, kan duap leh mai palh ang tih a hlauhawm tih lai chho te kha ka rilruah a rawn awm a. Tun tum ah hian Hmar unau te ka lawmpui em em a ni tih kha ka sawi duh a. Harsatna kan tawh thin a, kan harsatna kan sorkar-in a hria a, chu chu tunah hian kan tum ang chiah chu a la nilo. Mahsela goal pakhat chu min han thlenpui chu a ni a, tah hian ka lawmpuina thu ka sawi duh a. Chutih ruala ka sawi duh chu tlema han huaisar deuh apiang hi kan ngaihsak em ni chu aw tih ngaihdan ka nei deuhhlekk a. Zepthu a awm lemlo a, kan bial angah te khian PTC te pawh a awm a. Tin, Sinlung ang deuh hian Sialkal Development Council te pawh kan nei chho a. A ngawi apiang mai hian thil hi kan chan emaw tih mai palh hi a awlin ka hria. Nakinah a nawra nawr ngai kher lo in anni lam pawh hi kan sorkar hian min ngaihsak a tha ka ti a.

Fapa tlanbo chungchangah khan a naupang zawk kha a tlanbo a, a va in khawhral vek a, a lo haw leh kha a pa khan puan tha tha a sin tir a, kawr tha a pe a, bawng te a talh a ni. Amaherawhchu a u, tha hle hlea awm kha engmah a pe ve ta si lo a, an boruak chu kan hriat vek kha. A fapa u chan kha kan chang deuh hlek hian ka hria a. Nakinah kan dam ang a Sialkal Range Development Council te pawh khi dinhmun tha zawka kan awm theih hun hi kan hmahlir a ni a. Tunah khian Sialkal Range Development Council-ah khian kan sorkar hian kumtin nuai 50 min pe a. Khaw rukin kum 1-ah nuai 10 tlinglo, nuai 8 vel chauh te kan dawng a ni. Engpawhnise, khilaila hnam hnufual, keimahni kan area hnufual tak min chawikang tur hian kan sorkar hian kan la ti leh tur ah pawh ka ngai a. Kum thar lamah, term thar leh ah Dr. Beichhua te an la rawn chhuah hmel lemlo bawk a, kan sorkar leh ngei turah ka ngai a. Chutah chuan mi in harsatna an rawn siam tak tak hmaa kan sorkar-in kan lo ngaihven tak tak hi a tulin ka hria a. Sialkal Range Development Council tan khian nghakhlel takin kan thlir ve a ni, tunah hian kan Hmar unaute hi kan awt a ni tih kha ka sawi duh a ni.

Vawiinah Bill hi a thuphung a tha a. Tin, hetiang dan kan han siam hrim hrim hi vawikhatnaah hi chuan member zahawm tak Pu Sangthuama sawi ang deuh khan sawisel tum hrim hrim hi chuan eng emaw hi a awm teuh mai a. Amaherawhchu, kan hmang ang a practical in, kha lai ah khan harsatna hi chu kan siamtha zel thei a ni tih kan hria a. Kan Home Minister zahawm takin vawinah mumal takin hetiang kan ramah remna leh muanna tluantling a lo awm theih nana bill a rawn chhawpchuak hi tha ka ti a, ka lawm em a, ka rawn support a ni. Ka lawm e.

DEPUTY SPEAKER : Hun i hmang thiam khawp mai. Tunge sawi leh ang le? Sawi duh kan awm tawh lo em ni? Kan sawi tam viau tawh a. Pu Lalruatkima.

PU LALRUATKIMA : Py Deputy Speaker, ka lawm e. Vawiinah Home Minister zahawm tak bill putluh “Sinlung Hills Council Bill, 2018” sawina hun tha tak kan nei hi a lawmawm hlein ka hria. Kan hriat angin he Bill lo chhuah chhan hi Memorandum of Settlement between the Govt. of Mizoram and Hmar People’s Convention Democratic, 2nd April 2018-a ziah angin ti hian tunah he House zahawm takah hian Bill kan sawiho mek a ni a. Chutih lai chuan Pu Deputy Speaker, memorandum of settlement between the Govt. of Mizoram and Hmar People’s Convention, 27th July 1994-ah khan ziah a lo ni tawh a. Chutah chuan a hlawhtlin

dan te, a hlawhtlin loh dan te kan hmu a. Bill neituin a rawn sawifiah tawh a, hetah hian Autonomous District Council te phutin an thil phut te pawh lo danglam zelin wawiinah chuan 6th Schedule hnuaiia Autonomous District Council ni lo in Sinlung Hills Council-ah kan inrem thei a, a lawmawm khawp mai.

Inremna hi kan han ziak a, harsa taka ziah te a ni tlangpui thin a, a tihhlawhtlin hi party 2 te mawhphurhna a nih angin sorkar leh Hmar People's Convention Democratic te mawhphurh a ni a. Chutihlai chuan Memorandum of Settlement kan ziah hmasak zawk, 1994 ami kha tih hlawhtlin loh tam tak a awm a. Chutih rual chuan khamiin a ken tel "The Sinlung Hills Development Council Election Rule, 2008" leh "The Sinlung Hills Development Council Constitution and Conduct of Business Rules, 2008" kan nei a. Chu mi repeal nan chuan 18/09/2017 khan "The Mizoram Election to Sinlung Hills Development Council Rules, 2017" kan nei ta a. Tuna kan Bill putluh hi Act a lo nih hunah Rules te kan lo nei ang a, tuna Sinlung Hills Development Council hnuaiia kan Rules neih te hi repeal leh emaw, la tih danglam leh te pawh a ngai ang a, kalphung a inan loh zeuh zeuh tawh dawn avangin. Chung te chu ka rawn tarlang hmasa duh a.

Chutih rual chuan Sinlung Hills Council lo piang tur hi ka ngaihtuahnaah thuthlung chu tu te pawhin ziak se sorkar aiawh a ni a, a hmasaa kan kalphung kha a dik zawk awm mang e aw ka ti a. General Administration Department-in a enkawl a, tunah hian Home Department in a kenkawh zel hi nakin zelah harsatna a awm thei ang em aw tih te ngaihtuahnaah chuan ka nei a ni. Nakinah allocation of business rules te kan han nei a, siam that te pawh a ngai ang a. Chutih lai chuan Home Department-a a awm reng hi a tha ber ang em? Administration khawih thil a nih avangin General Administration Department in enkawl se Home Department atang hian mawhphurhna la se, election buatsaih te a ngai dawn a. Khang kha kan la sawi thleng chiah lo a. Engtin nge kan Home Minister zahawm tak hian ngaihtuahna a lo hman erawh chu ka hre lo a, chungte chu ka sawi lang tel duh a.

Inremna tha tak mai kan nei a, kan hriat danin HPCD te hi a command ang deuhin command 3 zinga command 1 hi inremna kan ziahpui deuh em ni chu aw tih mimal te chu kan han inzawt lo thei lo a. A chhan chu Cachar lam command te, Manipur lam Tipaimukh lam command te leh Mizoram command te, khalaiah khan tute ber hi nge, khalaiah khan harsatna an vai hian silai tung thei silai tih hi an ni reng em kan Home Minister zahawm tak hian he House kaltlang hian member te

min hrilh se a thain ka hria. Chutilo chuan mipuiten thil awm dan hi kan hrechiang lo thin a, han hriatchian pawh hi a tha a .

Chutih lai chuan he Bill in a ken tel zing ami Electoral Roll chungchang section 32-ah khan “Electoral Rolls of the Village Council” a ti a. Khalaiah khan Executive Council a tel tur pawh khan Village Council Electoral Roll-a a awm chuan tihna ah kei chuan ka ngai mai a. Khalaiah khan tuna thawm kan han hriat velah hian a aadhoc-in helaiah he Bill-in a ken tho ah hian “transitional period provisions” section 60-na ah khan a rawn awm a. Chu transitional period-ah chuan sorkarin ruahmanna a rawn siam tur interim Executive Council-ah pawh khan voters ni lo tan kha chuan awm ngaihna a awm dawn miah lo mai a. An ruat tumte kan ngaihtuahin Village Council roll a awm si dawn bawk lova, Local Council roll-ah chuan an awm dawn si a. Village Council Act hnuaiah khan an awm tlat lo mai a, khalai kha Aizawl mi tan kha chuan chuh kha kan sawi tak nangin a theih dawn lo a ni. Village Council roll-ah kan awm tlat tawh lo mai a, chungte chu kan ngaihtuahnaah a awm em? Ka sawi soal zawk nge Pu Deputy Speaker ka hre chiah lova. Chuvang chuan (ka sawi dik maw?) Municipal election rules-ah khan a hranpain urban municipal corporation awmna ah khan kha kha kan bei deuh em aw ka ti a. Telh leh mai a nih loh chuan nakinah court-ah min rawn khing ta se kan thiamlo thei mai ang aw tih te ngaihtuahnaah chuan a awm a, Village Council chauh kan huam si chuan.

Chu lo leh ah chuan hemi Sinlung Hills Development Council Rule 2018, election rules kan neih ah hian tha takin a rawn ziak a. Kan Village Council Rules, election rules ah pawh hian fimkhur ngai deuh mai awm chu non-Mizo an awm a ni, non-tribal an awm bawk a ni, hemi te tan hian kua kan hawng thei ang em? Kawngkhar kan hawng thei ang em aw tih te ngaihtuahnaah chuan ka nei deuh a. Chuvang chuan helaiah hianin Right to vote-ah emaw, tin, Disqualification for membership of General Council, section 36 leh Right to vote, section 33-ah emaw hian Scheduled tribe a ni tur a ni tih te tal kha lo dah ila chu kan him leh zual awm mang e aw ka ti a. Village Council roll hi kan him ta lo tih chu a hretute vek kan ni a, non Mizo tam tak an awm a ni. Tunah an tling lovang, amaherawh chu Executive Council-ah te pawh ruat theih an ni dawn bawk a, thlan theih an ni dawn bawk a, right kha an nei ve tlat a ni! Village Council Roll ah khan an awm teuh mai a ni, veng tam tak, khaw tam tak ah pawh niin ka hria a , chu chu ka sawi soal lo turah ka ngai a.

Tin, disqualification of membership of General Council, section 36-ah khan “is less than 18 years of age on such date as may be fixed by the Government or” ti a kum 18 hnuai lam te tan hmun a awmlh dan kha a rawn sawi a, a double em aw ka ti a. A sawi sa qualification section 35-ah qualification for Membership of General Council-ah khan eligible voters, registered voters nih a ngai a ni. Vote nei tur chuan kum 18 tlin a ngai tho tho a, 18 rawn sawi leh hi a double em aw ka ti a. Chutih lai chuan kum 18 kha vote nei si lo kha kan awm palh thei a, la ti leh zel teh ang, 1.1.2018 hi kan roll revision hnukung ber a lo ni a. Tunah roll revision kan neih loh phei chuan Birth Certificate produce a kum 18 tling reng si roll-a la awm silo, mahse kum 18 tling bawk si kha a awm theih dawn a nih hi aw tih te ngaihtuahnaah chuan a awm a. Mahse hetah hian min veng khat viau tho nangin fimkhur lehzuul nan khang kha ka rawn tarlang ni sela.

Sawi tur tam tak a awm hran lem lova, a tlangpuiin section 48-na ah hian Protection of the right of the non-tribal and other ethnic groups a ti a, non-tribal citizen te leh other ethnic group te (Hmar community ni lo te) an himna turte, an sakhua zalenna turte kha a tel a. Non-tribal han tiha minority, a bik takin Chalfilh biala khaw khat chu minority zawk kha ethnic group ang thoa interpret theih chu a ni anga, khamite himna, khamite chanvo rahbeh sak lutuk theihna kha (Pu DeputySpeaker, hun hi a laklawh tho bawk a, min lo hrethiam la) hetah hian a vawngnim tel turah chuan ka ngai a. Patent error neuh neuh kha chu sawi tel lo ila. Special provision for Council areas a ti a, religion and social practice of the Hmar Community section 52-naa a rawn sawi te, Customary Laws and Procedure of Hmar Community te, a dah rualin ethnic group a bik takin kan unau Paihte khaw hnih awm khi dah ve law law a tha mai em? Anmahni himna turte, an social practice ang chi an sakhua himna tur ang te kha ngaihtuahnaah chuan ka nei a.

Engpawhnise, inremna hi a hlu a, khawvelin a ngaisang a. Inremna hi a hlawhtlin zel theihna turin inremna neitute leh party te leh mipuiten mawh kan phur tlang a. Inremna kan han tih hian kan unaute timai ang, MURA te chaw ngheiin an la awm bawk a, inremna kan lo ziah pui a, pakhatin a hlawhtling an tia, pakhatin a hlawhtling lo an ti bawk a, khatiang te kha kan ni a. Chutih lai chuan politics-a hamthatna lak tum hi a tam zawk hi kan nih fo avangin HPC te nena inremna, thawhhona thuthlung election dawna kan lo siamte pawh ka rawn haichhuak mai mai a, chungah te pawh chuan party hian kan ngaihsak tawk lo a ni. Party ang zawnga inremna kan siampui pawhin kan mawhpurhna chin chin hi chu theihtawp chhuaha tih hlawhtlin tlan hi chu kan ko ah hian bel thiam ila a that ka ring a.

Chuvang chuan he Sinlung Hills Council lo piang chho hi Development Council, tuna ding chang chang, khup zawi taka ding ang mai ni lo deuhin mipuiten, 'Hmar thimpui, zangkhaw bungbut hnan,' an tih fo ang kha bo tawh sela. He Council hmang hian development pawh uluk leh zualin langtlang, transparency, kaltlang Council te pawh hi din a hun viauin ka hria. A chhan chu tuna Development Council kalphung han en hi chuan a dukhawp awm tawk lova, sum pawh kan pe tlem a. A hmangtute lahin duhthusam a ni tawk lo tihte chu kan hre vek a.

Khang zawng zawng kha ngaihtuah tlangin a hlawhtlin nan mipui leh sorkar pawhin theihtawp chhuaha kan tan tlan a tulin ka hria a. Heng hi min thendarhtu ni lovin Sixth Schedule hnuaiah kan inpek chuan kan inunauna, kan inpumkhatna a tihchhiat theih avangin chumi hria chuan kan sorkar pawhin hetiang hian a ti a. Mahse, hetah SAD te, land sole proprietary pek ang chi tawp kha awm lovin tunah chuan ruahmanna fel tak an nei hi a lawmawm a. Patent error neuh neuh chu ka sawi lovang a. Khang ka han sawi ho kha he House zahawm tak leh kan Home Minister pawhin ngaihtuahna min hman zui sak se thain ka hria a, chung chu ka rawn sawi tel a ni e. Ka lawm e.

DEPUTY SPEAKER : Dar 1 hi kan chawlh hun a ni a. Engtingge kan chawl phawt ang a, kan lut leh dawn nge? Sawi tur hi eng ang nge la awm aw? Kan chawl phawt mai ang maw? Kan chawl rih ang a, dar 2-ah kan thukhawm leh dawn nia.

2:00 PM

DEPUTY SPEAKER : Kan sawihona kan chhunzawm leh tawh ang a. Chawhma lam khan member 12-in an sawi a, dukhawp loh lai, siamthat ngai lai te awm bawk mahse a sawi zawng zawngin an la support vek a. Tunge sawi leh ang le ? Dr. K. Beichhua'n han sawi sela.

Dr. K. BEICHHUA : Pu Deputy Speaker , ka lawm e.

Vawiin hi Mizoram history-a ni chhinchhiah tlak, a bik takin kan Hmar unaute tan pheii chuan ni lawmawm tak niin ka hria a. A hmasain kan Hmar unau te lawmpuina ka hlan a, chutih rual chuan ka ngaihpaawimawh zawng point tlem te ka sawi ang a.

A preamble hi kan en a, 'with autonomy to some extend' a tih hian thui tak min ngaihtuah tir a ni. Pu Deputy Speaker, eng thleng nge ni ang, state sorkar azirin

an thuneihna hi a dang dawn a ni maw tih min ngaihtuah tir a. Helai hi ngun taka kan ngaihtuah ngai hle a ni.

Tin, a area chungchanghian tuna a area siam lova Council din ringawt hi a dik dawn em ni? A area siam fel hnuah Council hi siam ila. Tuna kan tihdan hi chuan harsatna min siam mai lovang maw. Section 30 sub-section (2) kha ka rawn sawi hi a ni a.

Section 35-a qualification for membership of General Council tih ah khan nichina member tam tak ten an rawn sawi tawh ang khan kum 18 mi member nih tir kha a fuh chiah ang em tih ka ngaihtuah a. State Assembly leh Parliament-a kan tih anga kan ti thei chiahlo a nih pawhin hei hi chu ngaituah chian leh a tha lo maw ka ti a ni.

Tin, section 53 – The Chief Executive Member and the Executive Members shall be deemed to be public servants within the meaning of section 21 of the Indian Penal Code tih nichina Home Minister zahawm takin a sawi khan patent error a rawn ti a. Hei hi siamthat nghal ngei ni se ka duh a ni.

Section 59 - Power to make rules chungchang hi ka sawi leh lawk duh a. State sorkar hian kan duh ang takin rules hi kan siamsak dawn em ni ang? Kan Hmar unau te duhdan leh memorandum awm tawh te anga siam tur a ni dawn lo em ni tih te ka rilruah a awm a. State sorkarin kan duh ang thala kan siam sak chuan an duhdan te a lo ni lo palh thei a, a tha ber dawn em ni tih te pawh ka rilruah a awm a ni.

Member pakhatin an Secretary tur a rawn sawi chungchang kha ka sawi ve leh duh a. State hian Chief Secretary kan nei a, District Council-ah chuan anmahni zinga senior most kha Secretary-ah an dah thin a ni. Tun ami hi a term fix sak hi thil tih chi a ni em tih ka ngaihtuah a ni. Term kan fix a kum 3 chung kan tih khan a term hman zolovin a pension lo hun sela thil dik a ni thei dawnin ka hre lova. Chuvangin elected member anga kum 3 chung tih tawp kha a dik theiin ka hre lo a ni.

Pu Deputy Speaker, vawiinah hian kan Hmar unau te duhsakna hlan ka duh a, He District Council lo awm turah hian kan Hmar unau te hian rilru fim tak leh ngaihtuahna thuk tak an hman ka duh a. He District Council hi thleibik neilo, NLUP beneficiaries kan sem ang mai maia kallo turin ka duh a. Kan Speaker leh Minister thenkhat ten 800 lakh an sem laia a then in 550 lakh leh a thenin 400 lakh an sem ang te, kan MLA thenkhat cheng khat mah kan sem tir loh ang te hi he

District Council ah hian awm lul lo se tih hi ka duhsakna leh ka thu chah ni sela. Chubakah chuan chem hriam tak, a hmang thiamlo tan chuan mahni inhliam theihna a ni ang hian anni hian he District Council hi hmang sual lova, tangkai tak leh morally and physically-a develop tu, spiritually-a develop tu atana hmang thei turin duhsakna ka hlan e. Pu Deputy Speaker, ka lawm e.

DEPUTY SPEAKER : Sawi duh kan la awm em? Pu Vanlalzawma'n lo sawi ve leh sela.

Pu VANLALZAWMA : Pu Deputy Speaker, ka lawm e. Kan ngaihtlak tawh angin Sinlung Hills Development Council Bill, 2018 kan sawiho mek a ni a, a lawmawm hlein ka hria a ni.

Sawi tur tam tak ka nei lova, a Bill ngau ngau ah hian ngaihtuah fuh loh deuh chu kan nei em ni aw ka ti a. Chumi ka sawi hma chuan thil pakhat ka rilrua lo awm chu he Bill kan buaipui laia thil lo lang nghal leh Memorandum of Settlement kan sign-a rilrua lo lang nghal a awm a. Nichina kan ngaihtlak tawh ang khan hetiang deuh chiah hi 27.7.1994 khan an lo sign tawh a. Kan Home Minister zahawm takin a sawi tawh ang khan kum 2 hnu lawkah lungawilohna a lo awm chhova. HPCD Pu Lalhmingthanga Senate pawl kha a lo piang leh a. Kha tho kha vawiinah hian rilru-ah a lo lang leh a ni. Khami ah khan tunge thiam thiamlo tih kha zawn kher a ngailo na a. Khami tum te khan Accord kan sign pui te khan, Hmar unau te khan an tih tur tih loh an nei em aw tih zawng te khan han ngaihtuah ta ila, an nei lo hian ka hre deuh va. Kemahni lam zawk, a sorkar lam hian kan tih tur hi kan ti lo a ni lo maw tih kha ngaihtuahnaah hian a lo lut nghal a. Mizoram Peace Accord chungchang kan sawi a, kan ngaithla thin a, 1986 a mi kha. Tun thleng pawh hian ka la sawi ve leh zeuh thin chu MNF lam khan an tih tur hi an ti kimin ka hria a, silai tun leh a tul an tih ve tur zawng zawng kha. Amaherawhchu, tun thleng hian India sorkar hian a tih tur tih loh hi a nei a ni. Entirnan, separate High Court tih te pawh a awm a, keinin Separate High Court kan la nei chiah lo va. Tin, border trade te pawh a awm a, border trade phei chu Mizoram sorkar tih theih pawh a ni lo va, central-in, Delhi-in hma a lak a ngai a, chungah chuan tih hlawhtlin loh hi a la awm a. Amaherawhchu, kang zawng zawng chung khan remna leh muanna kan nei chho mek a. Mi ram te pawhin an han thlir a an fak leh tun thleng pawha a sign-tu te leh khalaia mawhphurtute pawhin kan chhuan kha a la awm reng a, a ropui tho a. Chutih mek lai chuan India sorkar hian a tih tur tih loh zeuh zeuh a la nei a ni. Tin, kan tih tur ang kan tih loh kha a awm chiah lo in ka hria a. Tin, lungawilo deuh te pawh an

awm mai thei a, amaherawhchu, a silai lek leh zawng hian khata lo haw kan MNF unau te kha chu an awm chiah lo in ka hria a, a lawmawm khawp mai. Chutiang deuh hlek chuan tuna kan Hmar unaute nena kan han sign-ah pawh khan '94-ah khan tiang khan kan ti tawh a. Mahse, '96 atangin kum 24 a ral tawh a. Hmannia an hruaitu pakhat nen kan inkawm zawka a sawi chu, 'sorkar lam hian election te hi an ti lo reng reng' a ti. Interim sorkar-in min kalpui char char a, tun thleng in, kum 24 chhung khatiang hian a kal a. Nichinah member zahawm tak Pu Ruatkima'n a rawn sawi chhuak a. Khalam hawia inthlanna tur chi Bill te kha chu tunhnaiah te khan kan pass chho chauh a ni a. Chutiang chiah chuan tuna rilrua lo awm nghal chu kan phur tlan em em lai hian, kan lawm tlan em em lai hian, sorkar lam hian kan tih tur kha tih ve deuh vat vat a tul mang e tih kha ngaihtuahnaah a awm a. Hriat tawh ang khan tunah hian Group 1 nge group 2 lo la haw tel ve chiah lo te pawh an awm anga sawi hi a awm a. Khangte pawh kha engemaw zawng hian a arh leh hluai ang tih te kha thil hlauhawmtak a ni a. Chuvangchuan, sorkar lam pawhin kan tih tur kha rang deuh hlek a kan tih ve te pawh a tul ka ring a.

Tin, interim sorkar mai ni lo hian, anmahnin an duh ang taka inthlanna han neihpui mai te pawh hi thil tih theih a ni em aw, chawplehchilh te pawh hian. Anmahni thlanchhuah ngei an nih chuan rinai hian thil hi a dang thin a te ka ti mai mai thin a. Engpawlah pawh ni se, eng body-ah pawh ni se, MP-ah a ni emaw, MLA, Local Council kan ti a ni emaw, Council kan ti a ni emaw, mipuiten kut kan thlaka kan thlan chhuah meuh hi chu, inthlan lai hian han in nawk viau thin mah ila, kan pawm riau a ni. Tu ten emaw an ruatchawp mai hruaitu, party te pawh a ni tho, hruaituten kan ruat party hruaitu ai chuan mipuiin kut an thlak ngei hruaitute kha chu a thlang ve lo lam pawh hian kan pawm em em a ni. Chutiang chiah chuan tuna Chhinlung Council ami ah pawh hian inthlannate hi a rang thei ang bera neih a, khatia anmahniin anmahni aiawh an thlan te ngeiin ro han rel kha a hlawhtlinna tur pawimawh deuh a nih ka ring a. Kan Bill-ah hian ka rilru kap deuh thil thenkhat a awm a. Pu Deputy Speaker, a hmasa berah chuan 6-naa Trem of Office tih ah khan a term reizawng tur han tih tumnaah khan, The term of Office of the General Council shall be five years from the first meeting as appointed by the Government a ti ta a, from the first meeting tih kha General Council first meeting a nih ka ring a, mahse meeting loin reifu kha a kal theih a ni. CEM te pawh han inruat mahse, ka hriatsual loh chuan kan sorkar-ah te hi chuan Chief Minister kan lakluh chiah atang hian kan term hi a intan a, a tawpna pawh chu tho chu a ni. Assembly Session kha chu a hnu deuh daihah pawh nei mah ila, he term hi, tuna kan term te pawh kha, Chief Minister

zahawm tak lakluh ni atanga intan a ni a, chu chu a tawp ni tur kha a ni nghal baw k a Hemiah hi chuan General Council first sitting atanga chhiar tur ni awm tak kha a ni a. Thla thum danah tal emaw, thla hnih te thu lo se, tikhan, a term kha sei uak theih dan kha a awm a. Chulai tak chu kan ten mithiam enge an ngaihdan ka hre chiah lo a. A term awmdan helaia zia k hi first sitting ni lovin CM te an lakluh atanga intan ve tur awm tak a ni tih kha ka ngaihtuahnaah a awm a. Tin, nichinah member zahawm tak tak ten an sawi tawh a, quorum chungchang kha $2/3$ of the members a ti ta a, khami Council-ah khan. $2/3^{\text{rd}}$. Mahse, an thut tak tak chuan 50 tlin loh te kha a tam riau a nia. Tu te emaw in thlangin lo ni ta ila, member 12 thlan tur a ni a, kan Bill-ah hian. 12 ah hian 7 lehlamin chang se 5 kha lehlamin chang se, tikhan ro han rel dawn se, a opposition ho zawng an kal duh loh hian $2/3^{\text{rd}}$ an tling lo a tih nghal theih a, quorum an tling lo a tih mai theihin ka hria a. Hei hi enchian deuh a tha mang e aw. Ka hriatsual loh chuan kan House-ah hian quorum hi sawi a ngailo hrim hrim a, kan thu taima em em vek a, quorum lam hi question a awm ngailo reng reng a. Parliament ah te khu chuan $1/10^{\text{th}}$ an ti in ka hria, mahse, an thut tak tak chuan 50 tlin loh khu a tam a. Mahse, tuman an question loh kha chuan tikhan an kalpui a ni mai a, quorum kan tlinglo tih question a awm loh kha chuan. Mahse, kan House-ah chuan kan question a ni lo hrim hrim a, kan kal tha em em reng mai a. (Interruption)

Mahse helaiah hian chumi hneh deuh tak khan pakhat a sorkar lam kha 7 an thutin a leh lam 5 lo ni ta se, a sorkar lam ho zawng kal khawm kha $2/3^{\text{rd}}$ a nih loh dan kha a awm a, chu chu rorel thei lo khan a awm nghal tawp mai thei a. Heng lai te te hi chu ngaihtuah that leh chi a ni lawm maw ni le aw tih kha Pu Deputy Speaker, ka han sawi leh lawk duh a. Tin, khami quorum tho kha (Speaker at the Chair) Meeting of the Executive Council no. 28 leh no. 29-ah khan a awm leh a, Executive Council Meeting turah pawh khan quorum pawh kha $2/3$ a ti leh ta a. Entirnan kan cabinet kal dan hi ngaihtuah ila, Cabinet Minister engemawzat awm loh lai, $2/3$ tlin loh laia quorum a dik thei lo reng rengin ka hria a. Tin, khami Executive Council pawh kha a convene dan tur leh a tih dan phung a rawn sawi a pawh kha pahnihna ah khan “The meeting shall be convened by the Chief Executive Member by giving seven clear days notice in writing to each member of the Executive Council” a ti kher kher a ni. Ni 7 hmalama koh ngei ngei a ngai a ni, CM tan khan emergency deuhin thu duh ta se, thil thleng palh awm ta se, chhiatna rapthlak te naktukah hian a thut ngawt theih loh reng reng! ‘In hmu khawm ang aw, chuti khati’ tih ngawt hi helaiah hian a phal ngawt lo a ni. Ni 7 ngei ngei tur ang hian a lang tlat a.

Chungte chu a tak takin kalpui dawn se a buaithlak dan tur kha a hriatsain ka ring. Entirnan nimin lam thil te pawh ngaihtuah ang vawiinah, naktukah te pawh, khatiang thilah khan clear 7 days-a ziaka sem ngai, entirnan tunah hian khatiang khan lo apply dawn ta ila, kan sorkar-ah hian CM-in ni 7 hmalama lo sem thlapa, chumi chu, chumi chu a tih thlap ang khan kan kalpui a, a tak tak ang hian an kal hleithei ngawt lovang, emergency-ah chuan an thukhawm hlei thei dawn lo reng reng! Executive Council kha function tak tak se a issue azirin zanah pawh an inko rup rup duhin ka ring, mahse helai dan hian a phal lo ta a.

Tin, quorum lo awm leh kha 2/3 baw k kha a lo ni leh a, Executive Member thenkhat an zin bo lai lo ni se, quorum tlinglo khan thut theih loh te kha awm thei a ni. Chulaite chu ngaihtuah ngun deuh a ngai awm mang e aw ka ti a. Kan duhsak em em a, mumal takin kal se kan tih lai khan a tak tak hian kalpui dawn ila a har viau thei tlat a ni Pu Speaker, chu chu vawiinah sawi ngei ngei tulin ka hria. A chhan chu kan tihna rilru te pawh kha a chhe miah lo, mahse a taka thil kan han ziah chhuah takah hian tum loh deuhin harsatna ka taw k ngal thei a, engngemaw zawnga sawi duh chuan che hlei thei lovin kha Council kha a awm leh ngal der thei a, Chhinlung Hills Council kan tih lai tak kha Pu Speaker, ngaihtuah ngun ve deuh te pawh a tha mang e aw ka ti a. Tin, han sawi rik chhoh tak zelah chuan ka ngaihtuahnaa awm pakhat chu hemi kan tih chho lai hian inbiakna a awm tihte pawh a awm tih kan hre ve zel a, vui lam thu pawh ni lovin thil hi hriat tlan a chakawm ang reng thin a, mahse a tawpah khan a sign dawn hma ni vel khan sawmna chu kan hmu ve a, mahse ka tel thei lo va. Chutih mek lai chuan silai an tun niah te chuan advance deuha hriattirna/sawmna ka hmu avangin ka han tel ve hram a, advance deuh hlekin kan hmu baw k a. Tin, kum 1994-a silai tun programme-ah pawh khan Sesawng-ah ka han tel a, khatih lai chuan a hmingin YMA hruaitute kan ni a, tun tumah pawh han tel leh hram ka duh a, ka tel a. Khami tuma an HPC lam hotu thin pakhat ka biak zawk chu a vui deuh lek lek a, a awm ka ti tho a, a chhan chu khami 1994 sign chungchang kan sawi chhuah dan kha kei pawh ka lo ip rilru deuh a, hotu pakhat kha a tel ve reng baw k si a. A hnu khan, 'khalai kha chu an sawi nawi deuh a nih kha maw le,' ka ti a. 'Anmahni tho kha a nia sign-tu, anmahni remtihna thlapa sign a ni a, silai tun te pawh an hre vek a,' a ti a, a lungawi vak lo niawm chuan ka hre deuh a. Keipawhin kan hotute thusawi dan kha ka lo feel pui deuh a. Engpawhnise thil tha ngaihtuahna a kal chho zel a ni a, chutah chuan a hminga opposition lam te

pawh kha min hanrawn der ve ta se kan phur dawn tehlul nen tih kha vawiiinah Pu Speaker, ka sawi lang duh a. Thil tha tak pawh hi a tih dan phung azir kan hman chhoh dan azira lungawi kim hleihtheih lohna lai kha a awm ve thin a. Kan ngaihthlak ang khan NLUP te pawh kha a tira kan rel chhoh dan kha a that tehlul nen tuna kan han tichho tawp lamah hi chuan kan sem dan te pawh kha MLA ni manglo te pawh kha kan sem tir ta nualin ka hria a ni.

Hei message ka dawng nawlh mai a, D.O. letter, kan hotupa in kan Chairman a thawna te, leh tin, MLA mang lo hmingte a lo lang a. Chutih mek lai chuan bial hrang hrang chan zat te pawh kha a lo inanglo nuai mai a. Kan Chief Minister zahawm tak bialah hi chuan nuai 550 kha a kal niawm tak niin a lang a, a list RTI atanga kan zawn chhuahah hi chuan. Tin, kan Finance lam changtu bialah te hi chuan 450 ve ve a lokal leh a, NLUP Chairman bial lamah hi chuan 450 kha a lo kal leh a, MLA ni lemlo te kha sem tura D.O. letter thawn chhuahte kan nei a, kan lo ti nualin ka hria. Bial hrang hrang chan dan te pawh a inang lova, engemaw zawng tak hi chuan kan Chief Minister biala kan han pe tam te kha a fair viau kan ti mai thei a, amaherawhchu kan Chief Minister-in khati zat, khati chen a lo enkawl tawh a, khatiang dawngtu kha chu tlem viau tawh awm tak kha a nia, dawng tam berah khan kan la tang ang lawi a tih te pawh kha ngaihtuahna ah hi chuan a awm deuh a, 550 kha a lut vek a ni. Chung vel chu Pu Speaker, vawin bak hi sawina hun a awm vak tawh dawn lo ni te pawhin a lang a, han sawi rik hram ka duh a.

PU K.S. THANGA, MINISTER : Pu Speaker, a subject nen a in relevant lo hle a, amaherawhchu khalai sawi chhuah takah chuan Agriculture Nodal Minister ka nih nain sawifiah ka duh a, Chief Minister-te, Finance Minister-te hi an bial atana pek an ni lo va, Chief Minister phei hi chu khawi hmunah pawh mamawhtu an awm a, a discretion atan amahin a duh chuan a bial ni lo ah 1 crore kha khatiang deuh khan a bial kher ni lo ah khawi lai ah emaw phu ve an awm thei a. (PU LALRUATKIMA : Pu Speaker, khawngaihni NLUP/ NEDP convergence atan i bial chhung atan cheng nuai zanga dah a ni tih a ni.)

A wording chu eng pawh ni rawh se, kha chu an lo ziaak a nih pawhin a idea chu khati lai kha a ni lo va, Chief Minister hian hmun dangah pawh

mamawhtu lo hmaih palh pawh a awm thei a, chutiang chuan pek a ni tih hi wawiin ah hian ka sawi duh a. Chutiang deuh bawk chuan Finance Minister-te, implementing Chairman-te pawhin chutiang an lo nei a nih pawhin tlema an bial ni lo ah an mawhphurhna avanga lo beisei ve te khawi laiah emaw lo tih hmaih palh leh lo phu ve ngawih ngawih harsatna awm kha an biala a kal loh chuan tihngaihna dang a awm lova. Engpawhnise Pu Speaker, NLUP hi a tha a, kan opposition te hian an phur pui em em mai a. Vawiin term tawp kan hman dawn lai pawh hian pawn lama a hre ve lo te hnena va sawi bak hi NLUP ringawt mai hi an sawi a, SEDP pawh hi sawi ve ta zawk se, kan lo ngaihthlak sak zawk awm tak hi a ni a. Sawi tur hi an hre lo nge tih te pawh hi ka ngaihtuahnaah a awm rum rum a. Engpawhnise kha kha chu a bial a ni emaw, a bial lo a ni emaw, Chief Minister chuan a discretionary-a a tul anga a tih ve tur a ni tih kha kan hriat atan ka sawi duh a ni.

Dr. K.BEICHHUA : Pu Speaker, hleih neihna chungchang kan rawn sawina a ni a. Written-a a inziak meuh chu (interruption) kan ngaihdan a ni tih khan a luahlan thei dawn em ni?

Pu K.S.THANGA, MINISTER : Pu Speaker, hleih neihna a ni lo va. A tul anga an sem tur atana pek a nih khan a wording kha an lo siam dik lo deuh a nih pawhin (Interruption....)

Dr. K.BEICHHUA : Ziakin a awm alawm, written a awm alawm.

Pu LALRUATKIMA : Pu Speaker, kan subject hi bill a ni a, helaia NLUP-a lo inhniai vak pawh hi a fuh lo in ka hria.

SPEAKER : Pu Zawma'n sawi zawm sela. NLUP lam kha chu sawi tawh lo in.

Pu VANLALZAWMA : Pu Speaker, a hman dan kha example pek nan a remchang em a ka rawn sawi kai a ni a. Tichuan Chhinlung Hill District Council bill chungchangah kha chuan tuna kan sawi bakah kha chuan han sawibelh em em tur ka hre lo a. Amaherawhchu, nichina kan sawi point thenkhat kha chu uluk deuh hleka en a, a nih loh chuan a tak takin han kalpui dawn se harsatna a awm ve thei tlat a ni tih kha ka sawi duh lai tak chu a ni. Hun tha deuh min pe a, ka lawm e.

SPEAKER : Awle, member te zing atang chuan sawi duh zawngin kan sawi kim tawh niin a lang a. A bill neitu Home Minister zahawm tak kan sawm

hmain kan House Leader-in sawi tur a neih chuan amah i sawm phawt ang. Chief Minister zahawm tak Pu Lal Thanhawla.

Pu LAL THANHAWLA, CHIEF MINISTER : Pu Speaker, ka lawm khawp mai. A bill-a ka luh hmain NLUP hi a tha em a, flagship programme-a neilo tute pawh hian sawi hi nuam an ti a, a lawmawm ka ti. Tin, vawiinah hian NLUP avang hian India ramah state kilkhawr ber, kum 20 buainain a hrut hrep tawh hnu hi GSDP-ah a tha ber pali te zingah min hlangchhotu hi NLUP hi a ni. Jharkhand, Gujarat, Tripura te nen pali GSDP tha lawr lak kan awm a. Hemi a min hlangchhotu hi kan NLUP hi a ni. Tin, Pu Speaker, hengte avang hian vawiinah chuan ‘the least malnourished state’ tiin NITI Aayog hian min puang a ni. Vawiinah hian Planning Department ho in an rawn chhawpchuah a ni lo va. NITI Aayog ten Chief Secretary Conference-ah an puan a ni, heng zawng zawng hi.

Tin, vawiinah hian per capita income-ah national average aiin sang zetin kan sang a ni. Chuvangin NLUP hi an zu hek pawh hian Pu Speaker, party 5 President ten sign thapa an zuk hek pawh hian an hekna Prime Minister hian tha a ti khawp a, midangte pawh entawn turin a lo ti a ni. Chutiang zelin kan NEDP, NLUP supplement tura kan tih te pawh hi, kan hotuten an rawn duanchhuah NEC chuan India hmarchhak Chief Secretary zawng zawng hnenah entawn turin ziakin an hriattir a ni. Chutiang chu Pathian malsawmna kan dawn dan a ni a. Chuvangin keini Congress hi chuan ‘lawm chhungin Lalpa rawngbawl tur’, kan ti a ni. Lawm nachang hriat hi Lalpa duhzawng a ni a, lawm chung a Lalpa rawngbawl tur kan ti. Chutiang chu NLUP hi a ni a, chuvangin a lawmawm kan ti a ni.

Tin, kha mai kha a la ni lo va, mithiam rual kalkhawmin India ram state hi a lian 17, a te 12-ah min thliar a. A te 12 te focus point 20 atangin min han thliar a, 65 indicators-ah an then sawm leh a. Chutah chuan state 12, a te ho zingah chuan a top-ah kan awm a ni. Heng hi a titu ten kan Chief Secretary hmasa kha an rawn hriattir a ni. Chuvangin a lam tang programme kan siam avangin kan lamah a tang a, kan lawm hle a ni. ‘Keimah lo chuan engmah in ti thei si lo va’ titu hi engkim titheitu a ni a, NLUP hi a lam tang programme a ni. NLUP-in a zawn hi sorkar hnathawk khawsa thei te, dawrkai mihausa te leh mi khawsa thei te a ni lo va. Lal Isuan, ‘heng ka unau mi te ber pakhat chung a in tih hi ka chung a ti in ni e’ a tih a te kha a ni a zawn ni. Lo nei mi te, kuthnathawk mi te, ka tawng an huatthu suhah hmethai te, pachhia te, inhlawhfa te, chhumchhia te nen lam, chutiang chu a ni a. Chuvangin Engkimtitheia’n a rawn ti hlawhtling a. Heng kan programme te hian amah leh amah

a in chawimawi kan ti a, kan lawm hle a ni. Chutiang chu he programme hi a ni a, chuvangin Pu Speaker, vawinah hian keini Congress ho chuan ‘lawm chung a Lalpa rawngbawl tur’ kan ti a ni.

Kan bill-ah khan han lut ila. Kan bill hi 1994 a kan sign-ah khan, inbiaknaah khan ram pawn mite tel lo se kan ti a, kan hotuten an ti a. A chhan chu ram pawn mite nen problem kan nei lo va. Hemi buaina siamtu chu ramchhung mite, Mizoram khua leh tui te an ni tih a ni a. Chuvangin tel lo se kan ti a, an tel ta lo va. Tichuan inremna kan han siam ta a. Amaherawhchu, a tir atang khan min bum a ni, hei hi thudik a ni a, ka sawi hreh lo. A chhan chu chung lamin thudik a duh avangin thudik ka sawi mai thin, a hun nge hun lo chu ka hre lo. Kan inrem a, an ralthuamte an rawn surrender dawn khan an neih tha tha kha thingrem lianpui siam in khawi lamah nge an thawn kan hre lo, Parbung lamah nge, khawi lamah nge? Tichuan, opposition leader zahawm tak pawhin ‘an silai surrender niin Selingah ka tel ve,’ a ti a, lawmawm ka ti. Khatih laia kan Speaker chuan, ‘an surrender kan han fan kual khan HPC helnaah chuan kan PHE Department an lo hek ber a nih hi maw le,’ a ti. Pipe hlui hlir kha a ni, chhelo tak tak ka hmuh awm pawh ka hrelo, chutiang chu a ni a. A tir atangin min bum a, mahse chuti chungin kan hotuten nu chan, pa chan changin zaidam takin an dawm chho a, anmahni ah khan khatianga inbumna atanga lo dingchhuak an nih avang khan, dik tak chuan inthlan pawh kha an zuam hlei theilo. Tin, anmahni ah inlunguallohna a awm a ni. Chuvangin inthlan tir hleihtheih pawh an nilo a, interim ang khan an kal deuh reng a ni. Inthlan tir chu kan duh, democracy ram kan ni a, inthlan hi a tha a ni, mahse anmahni an inpeih loh chuan tihngaihna a awm lo. A duhlo pawl zawk kha an lian zel emaw chu aw tih tur a ni, chuvang chu a ni. Tun tumah erawh hi chuan kan Home Minister zahawm tak kaihruainain pawn lam mite pawh tel an phal ta a ni.

Tin, hetianga ram chhunga an chi leh kuang pui ten harsatna an siam hi ram pawn, Manipur ram atanga Hmar Inpui tih te pawhin tha an ti lo a, chuvangin inremna tluantling siam hi an duh a ni. Tin, anmahnia silai lek te pawh an duh a, chumi vanga in be ta hi kan ni a, kan Home Minister kaihruaina zelin harsatna tawh dawn pawhin an siam rem chho zel a, chutiang chuan a tawi zawngin sawi ila, inremna kan nei ta a ni. Tun tumah erawh hi chuan Manipur rama an hotute leh (in mihraana nilo sela) a Hmar nawlpui pawhin inrem tha an ti a, chuvangin inremna tha tak, zahawm tak kan nei ta a. Tin, silai an rawn tun ni pawhin kan Opposition Leader zahawm tak pawh a tel ve a, hmana Seling a an rawn tun ai kha chuan hmannia CTI-a an rawn tun te kha chu zahawm tak a ni, tak tak a ni. Tin, anmahni a

mihring a te pawh kha an zahawm ka ti. Tin, an zahawm rual rualin an rinawmna an rawn tilang te kha a lawmawm kan ti a, chuvangin tun tum ami leh hman ami kha chu inanglo tak a ni. Hman tumah kha chuan a tuk atangin thudik sawi mai tur, inbumna kan hmu nghal a, tun tumah erawh hi chuan vawiin thlengin rinawmna, takna kan la hmu chho zel a ni. Chutiang chu a ni a, chuvangin hman ami nen chuan han sawi kawp chi a ni lo tih hi kan hriat a thain ka hria a, chu chu tun hunah hian ka rawn sawi a ni.

Tin, hemi kan sawi rual hian thil dang tam tak ram leh hnam tana tha kan sawi a, ram pawn atanga lo lut infiltration hi a awm deuh reng niin kan hria a. Diktak chuan khawthlang lama kan Police Outpost-ah te leh Civil Sub-Division-ah te leh engemaw hetiang post kan neihnaah hian keimahni a ram leilung fa tak tak te kan dah hian, punitive posting, inthliarna anga ngaihna te hi a awm tlat a. Chuvangin ram leh hnam tana thahnemngaihna nen a hrehawm deuh a nih pawhin heta ka awm hian kan ram leh hnam tan kan tangkai thei zawk ang, a lo lut ru te ven nan leh chutiang zawngin ti a ngaihdan hi a awmlo niin a lang a, ka sawi soal chuan a midik te chuan min ngaidam sela. Chuvangin punitive posting-a ngaih a nih avang hian thahnemngai taka ti tang tang hi an awm a nih pawhin an tlem hle a ni. Chuvangin hengte pawh hi kan Deputy Commissioner te hetiang infiltration a awm theihna laia Deputy Commissioner leh kan SP te hi a hranpa in directory kan pe thin a, kan hriattir thin a ni. Chutiang zawng chuan kan thahnemngaih thiam dan ang angin kan kal a, chung chu kan theih ang tawpa kan inven dan tlangpui a ni. Chu chu member zahawm tak ten lo hria se ka duh a ni.

Tin, hemi Bill kan sawina ah hian thil dang han sawi luh talh a awm a, pawh ka ti khawp mai a, 'zalenna an soal lo, chutiang khatiang,' tih te kha keimahni lam min rawn tihna niin ka hria a, hei hi ka sawi chiang duh a ni.

28th Feb, 1966 zan atanga kan buai atang khan zalenna soal tak tak, kan ram maichamah an nunna, an thisen dahkhama zalenna soal an awm a ni. Pu Speaker, amaherawhchu soal lo an awm bawh a ni. Hei hi he ram hian history dik a record-na turin he House zahawm takah hian ka sawi a tul ta a, sawi tura min han nawr hi a pawh ka ti a, lehlamah chuan tha ka ti viau bawh a. 28th February zana Rev. Sakhawliana ina Senate sitting a awm khan (a tawi zawngin) khami zan khan zan dar 12:00-ah Assam Rifles pawh a zawng zawng lak tur, Treasury te pawh lak tur tih a ni. Khatih lai khan telephone a la awm lo a, motor tam tak a la awm lo a, Assam Rifles hi Aizawl, Lunglei, Champhai, Tuipang leh Sangau-ah an awm a, kan Ppolice

force pawh a lu ber chu Inspector a ni a, mahse buai hma lawk chawlhkar hnih thum velah khan (a niin ka hria a, a dik lo maithei) DSP a rawn awm ta a ni. Tichuan Rev. Sakhawliana ina Senate sitting chuan khata a lu ber, a hotupa ber khan zan dar 10:00 velah thulh leh a duh a ni. Amaherawhchu ka sawi ang khan telephone a awm lo a, khatih lai chuan sihdet E.D.E.D.M3 ti a inbiak kha a ni. Tuipang te, Sangau te va hriattir tur chuan Hmuifang tlangah kal a ngai, Hmuifang tlang va thleng tur chuan zan dar 10:00 atang chuan darkar 4,5, darkar 6 a duh ang khatih hunah chuan, motor te a chhia a, kawngte a chhia a, chuvangin Sangau leh Tuipang hriattir theih loh avang khan tum leh tum lo in Saberekakhuangkaihin kan ram kha a buai ta a ni tih hi thudik a ni a, Lal hma ah pawh puan ngam a ni. Thulh leh duh a ni, dar 10:00 velah khan, thulh leh theih a ni ta lo a ni. Tichuan kei pawh min underground luih tir an tum a, mahse “Kei chu ka underground dawn lo, kan ina in lo kal a in rawn sawm thin pawhin ka pa in a sawi kha in hre lawm ni? Thanhawla hi rawn ti buai rawn ti buai suh u, independent a theih loh, a theih lai 1940, 1941, 1942,1943,1944 kan tih vel lai khan nangnin min nuihzat a, lungthil ten min vawm a. Tunah chuan a theih tawh loh, a theih leh hun tur chu India a tluk chhiat hunah a ni ang. Thanhawla leh ka dam lai hian India a tluchhe lovang, chuvangin rawn tibuai rawn tibuai suh u. Tin, chengral in lek vaih chuan kan ramah tah leh hathialna in thlen ang a, a tawpah in in surrender leh ang. Chutiang atan chuan ka fapa hi rawn ti buai rawn ti buai suh u,” tiin a a chhang thin a ni. Amaherawhchu, ka tawng an huatthu suh ah khatianga an hotu lian zawng zawng kha Pu Sainghaka a ni emaw, Pu Lalnunmawia a ni emaw, Pu P.B.Rosanga a ni emaw, Aizawla In leh lo nei an awm lo. In leh lo nei chu an hotupa ber kha a ni a, Tuikhuahtlang-ah Assam type in tha vak bik lovah a cheng a ni. Chuvangin, keini tlangval hawk lak, khawlaimi ka ni a kan inchhar a, kan inah an cheng tam deuh ber a ni. Chungte avang chuan an office te pawh kan tanpui nasa a ni. Khatih lai khan tlangval tlawngawl ka ni a, ka pa in a phal emaw, phal lo emaw, an tih theih loh tha an tih si te ka tih sak a, Burma ramah pawh ka kal sak a ni, Aizawl atangin ke in Tidim thlengin.

Khami zan khan khatih laia an Army Chief Pu Vanlalhrauaia, Chaltlang (tunah chuan min awm loh san tawh a) leh Pu John Manliana te nen mahniin ke in in lamah kan hawng a ni. Khami zan khan hmar lamah chuan Pu C. Lalkhawliana inah volunteer ho an awm a, hmar lamah chuan Pu Sainghaka thlen in Pu R.Vankunga inah kan awm a ni. Tichuan zan dar 12-ah Assam Rifle post awm 5 kha lak tur a ni a, chu chu a lo buai tak dan

kha a ni mai. Chuvangin khata tang ringawt pawh khan tu te nge zalenna sulsutu in hre thei ang. Khatih laia volunteer hnam sipai ni ta te chuan zalenna an sual a, kan ramah an thisen an dahkham a ni, ka hria a ni.

Tin, khami zan khan an hotupa ber chuan ka underground dawn reng reng lo a ni tih ka hriattir avangin, “Pu Hawla zawng overground-ah kan chhawr ber ang,” a ti a, Pathian khawngaihna min chhawr ta viau reng a ni. Delhi-a an tan lain ngaihsaktu Mizo an nei lova, ka pizawn ruaiin bail tura zuk kal turin min tahawh a, mahni ringawta thil tih hi politics ah chuan in puhmawhna a awm thin avangin kan senior Pu Sainghaka ka sawm a. A thla a thla kan cham hnuah Pi Indira Gandhi phalna la in bail turin theihpatawp kan chhuah a, Charan Singh-a leh Desaia te lal lai a ni a. Helaah Special Force nen min veh a, khu lamah Janata Dal an sorkar bawka, tuboh leh dolung inkara awm kan ni mai. Pi Indira Gandhi khan theihpatawp chhuahin a sensitive zia ka hrilh ve ve a hemite hi. Khatia ka tlak hnu khan ka va leng a, ‘kan inbiakna hi sensitive stage-ah a awm tawh a, tha deuhvin in handle dawn nia,’ tiin ka ngen a. Mahsehei an tan tir ta mai a, paw ka ti khawp mai, ‘theihpatawh chhuah ula, a tul na naah ka lo buaipui ve ang che u,’ min ti a ni. A thla a thla kan chham hnuah Tihar Jail atangin kan bail chhuak thei ta a ni. Kar tin Tishajari Court-ah kawlbunin Magistrate hmaah an rawn produce thin a, chungah te pawh chuan kan lo din pui ve zauh zauh thin a ni. Engemaw chang chuan a inthlahrun awm khawp mai, hlauh tur Mizoramah a awm bawka, Delhi lamah a awm bawka; mahse kan Mizo pa Delhi-ah a tang a, chhantu a mamawh a, chhantu a rawn au va, engmah ni lo mahila theihpatawpin chhan tum ang kan ti a, Pu Sainghaka nen kan zuk kal a, a tawp a tawpah chuan Pathian khawngaihna kan a chhan chhuak ve theih ta hram a ni Pathian.

Tichuan, Tihar Jail atangin zan dar 12 velah kan bail thei ta a, a upa zawkin a upa zawka bail a, a naupang zawkin a naupang zawka fapa ka bail a, chutiang chuan zan dar 1 velah an chenna in CID ten an hual tlat avanga Mizo tumahin kan tlawh ngam tawh loh ah khan kan lut ho ta a ni. A hnu zela kan tih chu ka sawi tawh lo mai ang. Chuvangin helaiah hian dawta in puhmawh tur a ni lova, tumah (ka rawn sawi tak ah khan) ka sawisel lova, sawichhiat pawh ka tum lova, kei tehlu hi tumah sawichhe tur ka ni lo. Amaherawhchu, he ram hian thudik hria se ka ti a, sawi tura min chochhuah

tak avangin khang thudik, Lal hmaah pawh pharh ngam kha ka rawn sawi mai a ni.

Tichuan he kan Bill hi ka sawi tak ang khan tun tumah hi chuan Hmar In puite pawhin an support a, negotiation/inbiakna ah khan Hmar Community-a an mi pawimawh ber ber te an lo tel a. Dik tak chuan (ka tawng an hriat leh tawh suh ah) anmahni a chengral lekkawhtu te ai mahin pawn lam ami lo tel ve te kha an patling dik zawk emaw ni aw ti pawhin kan aiawha betu ten an sawi nghe nghe a ni. Chuvangin tuna kan inremna leh hmana kan inremna kha chu inang lo tak a ni. Chuvangin tunah hi chuan a tlo kan ring a, amaherawhchu, tih sual palh a awm thei a, chulaiah erawh chuan engtingge a kal zel ang ka hre lova. Chutiang chu Pu Speaker a ni, kan ram zalenna history dik tak chu. Tin, kan sawi zel dawn a nih chuan tawite sawi leh ila.

Ka sawi tawh kha a dikzia finfiah nan chuan 1965 Synod Conference-ah Rev.Zairema Silchara Synod-in missionary-a an dah kha conference hmang turin a lo chho va, MNF hotu lu ber ber te an va leng a. Tichuan anni chuan, ‘Mizoram hi Naga ram angin kan buai ve mai thei a, chu mi hunah chuan kohhran ho hian remthu sawiin ban in phar thei ang em?’ tiin an lo ngen lawk tawh a ni. Chuvangin kan kohhran te pawh khan nasa takin ban an phar reng a, a chang chuan sipai lakah harsatna te pawh an tawk a nih kha. Chutiang chu a ni zawk a, hemi thil ah hian in puhmawhna awm lo se ka duh. A sual lo pawl an awm a ni. Tin, khami nemngheh nan khan buaina 1966 kum tawp lam, 1967 kum tir lamah India rama lo kir leh dan tur rawn sawi turin Pu Vanlalngaia leh Pu Rozama te an rawn tir a, Commission Kariappa te nen Dholai IB-ah an inbia a, an haw lam kha intelligent lamah tih sual palh a awm a ni maithei, Karimganj lui kam ah anni 2 kha an man ta a. Chung te avang chuan harsatna te pawh a thleng a niang. Tin, a hnu zelah khan Pu Lalnunmawia, Vice President kha a rawn haw phei a, India nen inbiaka lo kir leh dan tur rawn ngaihtuah tur ni awm tak a ni. Pu Lalnunmawia kha President-in a rawn tirh a ni a. Hnam sipai ten he thu an hriat khan President an chhuahchhal a, anin a tir lo a ni tih a lo hrih a. Chuvangin Lalnunmawia kha khatilai thudik sawi leh tawh reng reng lo tur khan a awm a ngai! Khatia a thih dawn zan khan, tawhsual a tawh dawn zan khan kan in ah (June 25 ruah sur nasat lai a ni a) a nupui Civil Hospital-a awm kan tur in ka nupui leh ka nu in a chaw ken tur tiffin carrier-in an siam sak a, chumi keng chuan kan nihliap khum in damdawi in a pan a ni. Civil Hospital (private ward ah khan) a thlen atanga minute 15 vel ah rawng taka

thah a ni tih min rawn hrilh a. Rang takin ruah sur hnuai ah ka nupui nen kan tlan chho a, a ruang pawh a ngai ngaiin a lo la awm a ni, chutiang chu a ni.

Chuvangin hetiang thil ah hian a hre ve hlek lo ten a in puhmawh hi ka duh lo a, chuvangin inpuhmawhna a awm tawh loh na turin thu dik ka sawi a ni. Politician ho zing ah khan a soal lo pawl an awm a, a soal pawl pawh an awm mai thei. Hnam sipai te erawh kha chu an vai khan zalenna soal an ni, kan ram maicham ah an nunna, an thisen an dahkham a ni. Hei hi kan sawi chang apiangin keini chuan 'political leadership' kan ti thin a ni, hnam sipai te kan zah avangin. Tichuan remna leh muanna kan neih hnu pawhin, engemaw chen kan sorkar hnu pawh in martar te thlan siam a nih loh avangin chutih laia kan thalai te Pu John Rotluangliana, tuna kan Minister zahawm tak hi, thalai President ni in, 'kan hnam sipai te kan ram maichama an nunna, an thisen dahkham tute, boral ta te martar ta te, hi an thlan hi siam ila kan party pui hian min rem tih pui ang em?' min ti a, 'Rem ti e a, in theitawp chhuah in sum leh pai pawh a tul ang ang party puiin kan pe ang che u,' kan ti a. Home Guard hotute phalnain Sesawng-ah an theih ang angin martar te thlan an han din ve a.

Zoram dung leh vanga martar chhungte hnenah martar te chanchin, an thih dan te leh khatiang vel te an hming la khawm in theih ang chin chin chu tun thleng khian hmuh turin a la awm a. Kan phun champna naktuk naktip ah hian ti fai in kan han kalkhawm dawn nghe nghe a ni. Chutiang chu keini kan party hotu te leh kan thalai te chuan ram tana nunna hlan martar te zah dan an thiam ang tawk an entir a ni a. Tin, tun thleng hian tanpui an ngaih na ang ang ah chuan kan tanpui ve zel a, MURA ang mai mai kha an ni lo a ni.

Chuvangin vawiin ah hian kan theih anga kan tanpui na te duh ang tawk ni lo mahse kan theih ang tawk kan tih ah hian min rawn beltu te chu lungawi zel an tum a. Chutiang chuan vawiin ah hian kan theih ang angin kan hotu te hian an zah avangin an la chhawmdawl zel a ni. Chutiang chu a ni a, chuvangin engmah hre mang si lo, a bul a bal hre mang si lo a inpuh mawh mai mai hi politics-ah one upmanship zawn vang mai maia tih tih atan a tha lo a ni tih hi he House hi ka rawn hriat tir duh a. Thudik sawina hun min pek avangin Pu Speaker, ka lawm e.

SPEAKER : Awle, tunah chuan bill neitu Home Minister zahawm tak Pu R. Lalzirliana tlip turin kan sawm ang a. Member zahawm tak te thusawi atang khan sawisel ngai te a awm leh a sawifiah ang a, tichuan a sawi zawhah pass rawn dil nghal tawh mai se, amah i sawm ang.

PU R. LALZIRLIANA, MINISTER : Pu Speaker ka lawm e. Member zahawmtak tak ten ka bill “The Sinlung Hills Council bill, 2018” min sawi sak a. House Leader tiamin mi 15-in kan sawi a, ngaihtlak a nuam khawp mai a. Kan thusawi te a chhiatna lai zawng hrim hrima he bill chungchang ah chuan sawi kan awm lo in ka hria a. Member zawng zawng te chungah lawmthu ka sawi hmasa a ni. Kan member te hming ka sawi vek seng lo ang a. A hmasain Pu Lalthanliana a hmasa berah han sawi ta ila. Section 35 Council member thlan theih tur chungchang ah khan kum 18 hi an naupang lutuk a ni a ti a, midang pawhin kan sawi teuh mai a.

Helai hi a minimum kha an rawn sawi a ni mai a, helai bill hian. Amaherawhchu member ten kan ngaihpawimawh hi chuan MLA te hi kan indah pawnlang lutuk mah mahin ka hria a. Helai hian official ten an thiam ang tawkin tha ni a an hriat angin an rawn draft a, bill a lo kal a. Chu chu House-ah hian kan sawiho ang a, kan duh chu tidanglam thei kan niin ka hria a. Patent error leh minor mistake ang chauh hi correction siam kan tum mai a ni tih hi ka ngaihtuahnaah chuan a diklo hlein ka hria. Chuvangin, hemi kum 18 elect theih chin, rorel thei chin tur hi an la naupang lu deuh a ni, kum 18 kha lo thlang ta tlat mai se Chief Minister-ah te khan a tha lovang, an rilru a la puitling tak tak tawk lo ve kan tih chuan engahnge kum 25 emaw, kum 21 tal emaw ni zawk rawh se kan tih mai loh tih hi ka ngaihtuahnaah hi chuan a lian viaw a ni.

Hei hi kan kuta awm a ni tih kan zavaia hriat turin ka sawi hmasa duh a. Tin, Secretary hi kum 3 atan appointment pek tur a ni tih hi member zahawm tak tak pawh khan an han sawi a. Amaherawhchu an lo pension dawn anih chuan pension mai tur a ni, extend kher a ngai chuang lo va. An pension mai ang a helai atanga thlan ang em em tur an ni lo va. Tin, Secretary hi executive te nena an lo thawk ho theih loh pheih chuan heng hi thlak theih loh an ni bur lo a ni tih hi kan hotuten an hriat a pawimawh awm mang e aw ka ti a.

Tin, Power & Function of Sinlung Hills Council tih hi member te khan an han sawi nual bawka, Section 44-in a rawn sawi anmahni sum leh pai an hman anmahni bawkin audit-a khatianga ti mai mai tur an ni lo va, CAG ten audit tur a ni tih kha a rawn inziakin ka hria. Member thlan chungchangah khan Aizawl atangin emaw, hmun dang atangin emaw, Saihalam atangin emaw kan va in candidate mai dawn em ni tih kha kan hresual

deuh hlek emaw ni aw ka ti a. Section 35-na hian a sawifiah vek mai a, Chiang taka in lo en chuan khang kha a hriat theih mai awm mang e. Qualification for membership of General Council tihah hian a person shall be qualified to be elected to the General Council if he register as voter in electoral rolls as define in sub-section clause (I) of section 32 of this Act tih a ni a. Electoral Roll-ah Siaha ami kha a va awm ve lo ang a, Aizawl ami kha electoral roll-ah a awm ve dawn chuang lo va, heng hi kan en kim lo deuh hlek a ni mai thei e. Chuvangin an ngaihtuah awm lo ve helaia thlan tura hi chu. Kei pawhin ka ngaihpawimawh lai ber zawk erawh chu khalai roreltu tur thlan turah khan kum 18 elect han tih kha a hniam lutuk a ni lawm ni? Ala naupang lutuk lo maw ni tih kha a ni. Member ten sawi tam tak in nei a, kan official te pawhin an lo hre em em a, an lo chhinchhiah a, nominated seat-a a awm tur hi pahnih kan han ti a, kan chai vel chhung kha a rei khawp mai a, a bial neitute pawhin khatih lai khan han sawi ve se chu constituency pathumah bial tin atangin pakhat theuh dah nise tih kha a awm viau a ni. Mahse pahnih kan lo ti tawh si a, khalai kha engtingge kan tih dawn? Dan chu vawikhatah kan han siam ang a, a tira India sorkar ropui takin Dan tam tak, phok tam tak an lo siam pawh hi amendment hi a tam tawh khawp mai a, nakin lama siam belh te pawh a tul mai thei e.

Member zahawm tak thenkhat khan HPC D te hi tunah hian in ti kim em command thum lai awmin an sawi a tih kha Home department chuan thuang hnih thuang thuma an awm hi kan hre ve miah lo va. Zosangbera lam leh Lalhmingthanga Sinate ho an awm tih chauh kan hria a. Inbiakna kan neih lai khan lo tel vek se kan duh khawp mai a, kan duhna te hriain inbiaknaah hian kan tel ve ange tiin CID kaltlangin sorkar an rawn dil a. Chuti na na na chu, 'Remna hi kan duh ber a, 1986-ah pawh remna siamin khatih laia kan Chief Minister zahawm tak vawiina kan Chief Minister la ni reng hian a dinhmunte hre ranin Chief Minister nihna kha electoral roll-ah pawh awm lo te kha a pe thei a, chuvangin keini chu remna leh muanna duh party kan ni a, chuvangin lo tel ve rawh se,' kan ti a. Amaherawhchu inbiakna kan thut tak tak hmian Pu Speaker, engnge an rilru hriat a tha ang kan ti a. Chutia kan tihna chhan chu VC bye election dawn khan kan MLA zahawm tak tak te nen Sakawrdai tlang dungah kan han kal a, chutah chuan khawtual mi a khaw nawtin min lo hmuak a, chungah chuan khawtual mi te au rualin 'remna leh muanna kan duh, HPC D leh Mizoram sorkar in be rawh se,' an lo ti a. Chuta

kan chhanna chu (a tawi zawngin sawi ta ila) HPC D te nen hian kan in biak dawn chuan Autonomous District Council hi an demand tawh tur a ni lo, Hmar mipuite hi Mizoram ah hian a neitu in ni a, sumdawng Aizawlah ni se a lian ber ber in sumdawn hma an hruai a; tin, lehkha thiam lam ni se lehkha thiam hmasa te hi Hmar unau te an ni. Chuvang chuan Hmar mipuite hi Mizoram-ah hian minority ang ziazanga in chet hi a rem tawh lo a ni. Chuvangin, Autonomous District Council in demand chhung chuan in naute hi hrilh rawh u, Mizoram sorkar nen kan inbe lovang a, inbia pawh ni ila, kan inrem leh chuang lovang, kan inbiak hma ai khan thinrimna a zual ang a, kan inbeihna a sosang ting zawk ang,' tiin kan kalna khaw tinah khan min lo hmuaktute hnenah kan hotuten an sawi a ni. Zannah kan han thukhawm a, chutah chuan kan MLA te chuan kan duh ber chu vote a ni si a vote kan va hmu awm lo ve mawle, anni duh ber pawh Autonomous District Council a ni si a an ti a. Amaherawhchu, a hminga leader, khilaila han kal ta chuan, 'kan duh hi chu kan tum, a theih hi chu theih, theih loh chu theih loh tih mai law law hi kan ramah hian kan nun dan tur leh kan tih dan tur zawk ni ah i ngai ang u,' tiin kan sawi a. Chutiang chuan inbiakna kan han nei leh ta a, inbiakna kan neih ah pawh chuan an duh ber chu Autonomous District Council a ni tih kan hria a. Amaherawhchu inbiakna neih chuan inrem lo te kara inbiakna neih tur a ni a, anmahni pawh inhnukhniamin khalam kha chu an rawn sawi ri ta lo nghe nghe a, chuvangin tun hun pawh hi kan thleng thei ta a ni.

Tichuan, HPC 'D' Pu Lalhmingthanga lam chuan kan Police te kaltlanga kan han zawh khan engnge an demand an rawn ken tur chu kan han ti a. Anni chuan thil pathum an rawn sawi a, pakhatnaah chuan Autonomous District Council Sixth Schedule hnuaiyah lo chuan an han ti ta phawt a. Pahnihnaah chuan tripertite in kan be tur a ni, India sorkar aiawh an tel ang a, Mizoram sorkar aiawh an tel ang a, keini aiawh kan tel tur a ni an ti a. Khatiing khan thil chi hrang hrang an rawn demand tak avangin 'ngawi teh u, hei hi chu Pu Zosangbera lam kan biak dawn pawhin kan sawi sa a ni a, kan tihtheih loh tur leh inbiakna ah kan inrem chuang lovang tia kan sawi sa a nih avangin hetiang an demand dawn chuan i be lo law law ang,' kan ti ta a, tun thleng hian kan be ta lo a ni. Anni chauh kha an awm tih kan hria a, midang an awm ve chu kan hre lo a. Kan House Leader zahawm tak khan a rawn sawi a, inbiakna hmasa 1994 lamah kha chuan Mizoram pawn ami kha kan be tur a ni lo, anni nen harsatna kan nei lo kan ti a, a dik a. Amaherawhchu tun tumah hi chuan hun a lo kal a, tuna fuihpawrhtu te leh chaw lo pe a, tui lo tulhtu te, an mamawh tinreng lo pe thintu chu state pawn ami an ni tih kan hotuten an hria a. Chuvangin tuna HPC 'D'

volunteer leh hotua awmte pawh hi Mizoram chhunga awm chauh an nih loh avangin remna kan nei tak tak dawn a nih chuan ram pawn amite pawh hi bia ila, nakinah a roreltu ah pawh inrerim chhung chuan an rawn awm thei ang kan tih tak avangin tun hun hi Hmar Inpui, Manipura awm te leh midang zawng zawngte nen inlungual taka Hmar hnam zawng zawng chu kan tithei lo deuh ang a, Lalhmingthanga lam an la awm ve tlat loh avangin a tam ber ten an duh avangin tun hun hi thleng kan ni a, kan lawm hle a, anni pawh hi tuna Zosangbera lam kan biak remna hnuaiyah hetiang a lo enkawl tura an lo luh ve duh chuan kan Chief Minister leh kan sorkar hian englai pawhin a welcome reng a ni tih hi wawiin hian ka sawi nawn leh a ni.

Tin, interim chhung lo ah hi chuan General Council member emaw, Executive member-ah emaw kha chuan awm thei dawn lo a ni tih section 36 (d)-ah hian tarlan a ni nghe nghe a ni. Tunah erawh chuan a lu ber CEM kan tihte leh Chairman te pawh ram pawn ami tur an ni ang a, anmahni an rawn inruat avangin keinin kan lo paih ngawt thei lo a ni. Chu chu wawiin ah hian kan puang nghal dawn nge puan nghal theih thovin kan peih vek tawh a, kan puang dawn rih lo ka hre lova. Wawiina kan puan loh pawhin naktip nakthai ah te chuan kan puang nghal thei dawn a ni tih ka han sawi nawn leh a ni.

PU LALRUATKIMA : He House kaltlang hian min hrilh law law sela, kan hriat thawi hi a dik nge dik lo khawngaihin.

Pu R.LALZIRLIANA, MINISTER : A bill te kha han ti phawt ila, Speaker thu thu a ni ang chu, ani hi a lalber a, amah pawh kan rawn nghal ni se. A hming han lam leh ta lawk ila, Pu R.L.Pianmawia, MLA zahawm takin khilaia kal an lo ambush te kha Subject Committee an ni lova Assuarance Committee an ni a, kha kha correct ni sela a ti a, helaia correct pawh hi a that tho rualin kan speech kha min rawn pe leh dawn tho va, hei hi bill-a awm a ni lova, a hranpaa bill lama zuk tih vak kha a ngai lova, keimahin ka speech-ah khan ka lo tusual a, correction kha chu ka lo siam mai thei a ni tih ka han sawi a ni.

Boundary chungchang hi memberte khan in ngaimawh viau a, a ni lah tak a, keini chuan boundary hi kan lo hriatsa a nih avangin Act-ah hian kan lo thun lova; tin, Act-a thun chi chiah pawh a ni lo maithei a, anmahni engemaw in siksawi a, intizau a, inti zima kal thei an nih ve avangin an boundary hi chu constituency pathumah hian a constituency angin a ni lova, tlem zawk mah mah hi helamah hian rinchhuah a nih avangin constituency pathumah hian khaw tam tak hi Aizawl leh

Kolasib District lamah hian a awm a ni tih ka han sawi tel eh duh a. Tin, an pawisa te hi direct funding tur em ni ang tih te pawh kha sawi rik zeuh kha a awm a. Hei hi direct funding tur a ni lova, direct funding kan tih chu central a zu kawm em ka hre lova, khalai atanga pawisa hmu ve tur an ni lova, keimahni state chhung atanga pawisa hi pek tur a ni a, chumi hnuai atang chuan an pawisa hmanna tur te chu an lo siam ve dawn a ni. Amaherawhchu, NEC-ah te, central pool hrang hrang atang te in NLCPR atang te khan an dil ve thei ang a, chu pawh chu Mizoram department through-in tuna kan tih ang tho hian dil ve tur a ni dawn a ni.

Kan ngaihthlak ang khan he Danah hian repeal tur a awm hran lova, repeal tur bera chu MoU-a chuang (1994) ami te erawh kha chu repeal vek a ni tih member zahawm tak ten kan hriat atan a tha awm e.

Kha kha ka han react theih chu a ni deuh mai a. A conclude nan chuan, kan hriat theuh ang khan kum 1994 khan khatih laia HPC 'D' te kha Mizoram sorkar-in inremna lo siam pui tawhin, chu inremna thuthlungin a ken tel angin, Mizoram hmar chhak lamah Sinlung Hills Development Council pawh lo din tawh niin tun thlengin he Council hi la kalpui a ni a. SHDC hian an phak tawkah hma la in sorkar lam atanga han tihchak deuh tum pawhin Dan bulfuk Act hmanga din a nih lem loh avangin interim pawh kha kum 2 chhung tih tur a ni tih kha executive order maia tih a nih avangin kum 2 chhung interim council atan khan tih a lo ni ta a. Mahse tunah chuan Dan bulfuk tak Act hmanga din a lo nih tak avangin thla 6 chhung atan interim council hi tih a ni a, thla 6 chhung ngeia tih kan duh a. Amaherawhchu he Danah bawh hian, a theih loh chuan thla 3 chhung emaw extend theih a ni ang tia bituk te pawh a awm nghe nghe a ni.

Tin, engatinge tunah Home Department-in hei hi an keng a, nakin deuhah te chuan election te pawh a lo ni ang a, Home Deptt. ken zel hi a rem dawn em ni tih zawhna ang deuh kha awmin ka hria a, 'rem lo e' tih a ni. Tunah hian Home Department-in han ken nachhan chu (GAD tih tur a ni a) GAD hi inbiaknaah an tel ve si lova, kha inbiaknaa tel te, khami MoU tanchhan khan he Dan hi siam tur a nih si avangin he Dan, a tir te atanga lo tel, MoU inbiaknaa hretu te khan an ken tlang mai loh chuan a rei lutuk ang e kan ti a, chuvangin GAD lam an muang lutuk ange tih lam pawh ni chuang lo, hna an thawk theilo ang tih lam pawh ni chuanglo, anni tan pawh lungawilohna tur a awm chuanglo, a lo hretu hmasa te khan han keng tlang se, anni nena kan inremna hi tihpuitlin sawk sawk a nghahhleh awm e, tih avanga tun hi keng tlang chho mai kan ni tih ka sawi duh a.

Tichuan, Sinlung Hill Development Council hi Dan siam pawlten Dan an siam ngei Act hmanga din tur a lo nih takah chuan, changtlung zawk leh awmze nei zawka kalpui ni se, HPC 'D' te pawhin Constitution sixth schedule hnuuia Autonomous District Council hial an phut tawh thin dahtha a min lo pawmpui theih tak avangin kan lawm hle a ni. Tun tuma inremna thuthlung kan siam tak hian kum 1994-a inremna thuthlungte kha a lo luahlan ta a. Inremna thuthlung in a ken tel sorkar lam atanga tihtur hrang hrang awmte pawh hlenchhuak tura chak taka hma lak chhoh zel tur a ni ang. Tin, sorkarin a tihtur a tih bak kalpuia bawhzui turin Sinlung Hill Council lo enkawl lailawk tur, interim Council pawh din nghal mai tur a ni. Tin, interim council awm hun chhung bituk piahlamah chuan tam tak an term extent tawhlo in mipui thlante ngeiin Council kaihruaina an chelh theih nan inthlanna pawh nei turin hma lak nghal a ni bawkw ang.

Pu Speaker, ram leh hnam hmasawna leh thanlenna atan remna leh muanna hi thil pawimawh hmasa berte zing ami a ni a, HPC 'D' ten lungawilohna anmahnia intuh avang leh phut neia ralthuam an chelek tak avangin Mizoram hmar lam hmun engemaw zat chu ralkhelin kum 20 chuang a lo awm tawh thin a. Thil harsa leh khirh tak tak paltlang a nih tawh hnuah inremna thuthlung ziah fel a lo ni ta hi mimal tak pawhin lawmawm ka ti hle a ni. He inremna hian Mizorama hnam hrang hrang chengte zingah inlungualna leh inunauna thuk zawk a thlen ngei pawh ka beisei a ni. Hmanni lawk khan Churachandpur-ah kan Home Secretary leh OSD te nen kan han kal a, chungah pawh chuan ni dang an ang lo a ni. Nidang an an lohna tak pawh chu, an arms rawn tun ni khan, khatiang ang reng khan 1994-a arms an tun khan kan chheh vel state atangin lawmpuitu an lo kal reng renglo; khami ni khan state dang atangin lawmpuitu an tam em em a ni. Tin, khilai kan han kal pawhin an lawm zia thu lo chu sawi tur an hre lova, 'a nuam khawp mai, a hlimawm khawpin kan hria,' an ti a ni.

Mizoram sorkar leh HPCD te inremna thuthlungin a ken tel he Chhinlung Hills Council Bill, 2018 hi tunah chuan kan lo sawi zo dawn ta a. Chumi hma chuan a tawp nan tak tak, he in hi kan Chief Minister zahawm tak ngaihdan laa kalpui vek a ni a. Chuvangin he inremna hi kan sorkar leh kan hotuten tha an tiin tluantling ngei se an duh a. Tin, Home Department-a Police te, Intelligent lam kan CID te thawhna hi a ropui kan ti a, an chungah pawh hian kan lawm hle a ni. Chutiang chuan ram pawn amite hi tun tumah an tel lo thei lo a. A chhan chu nachinah ka sawi tawh a, ram pawn lam hi an ei bel leh an ei bar lakna leh chumi tan chhana keini min rawn kap thin an nih avangin, tunah chuan a tak takin heng hian Mizoram lam hawi hian

silai an tin ngai tawh tur a ni lo tih te an nih hlawm avang leh an Army Chief te leh midang daihin, chutiang kan ti ngai tawh lo ang tia mimal tak pawha keimah min tiam tu te an nih avang hian, tunah hian rin loh tur an awm lo va, rinhlelh tur an awm lo va, an chungah hian rinna kan nghat a ni. Remna tuantling kan neih ngei pawh kan beisei a. Tichuan, vawiinah hian he Chhinlung Hills Council Bill, 2018 hi he House zahawm tak hian min pawmpuia min pass sak turin ka ngen e. Ka lawm e.

SPEAKER : Minister berin a remtih avangin Recorder te khan Assurance tiin in record-ah lo thlak tawh ula Chair phalna in. A pahnihnaah, tuna kan Bill hi kan pass tawh hnuah Act a ni dawn a. Chumi Act hnuah Interim Council din tur a nih avangin, tuna Interim Council dinte han puan kha chu a thatna in a tlin lo ve, a pre mature kan ti a, puan rih lo ni se, kei Chair ngaihndan a ni.

Aw le, tunah chuan kan Home Minister zahawm takin ‘The Chhinlung Hills Council Bill, 2018’ chu he House in pass pui turin a rawn dil ta a. Pass remti zawng, ‘Remti’ ti ru le. (Remti) Remti lo kan awm em? Kan awm lo. Tichuan, ‘The Chhinlung Hills Council Bill, 2018’ chu he House hian lungruual takin a pass ta a ni.

PU R LALZIRLIANA, MINISTER : Pu Speaker, ka lawm e.

SPEAKER : Lungruualna hi ram leh hnam tan himna kulhpui ber a lo ni e. Kan lungruual a a lawmawm a ni. Vawiina kan tih tur hlim takin, tluang takin, tha takin, fel takin Pathian zarah kan ti zo thei ta a, a lawmawm hle a ni. Kan bang ang a, naktuk dar 10 ah kan kal khawm leh dawn nia.

House is adjourned.